

萬有文庫

第一集一千種

王雲五主編

陸放翁集

(十二)

陸游著

商務印書館發行



陸放翁集

(十二)

陸游著

國學基本叢書

陸放翁集

劍南詩彙

卷第六十七

倚筇

老翁愈老欲安歸。歸臥稽山飽蕨薇。未免解牛逢肯綮。豈能相馬造精微。靈山有士拈花笑。闕里何人鼓瑟希。我亦倚筇桑竹下。白髯蕭颯滿斜暉。

薄暑

冲夏暑尙薄。孤村日尤長。僧坊初施浴。行路亦饋漿。老我絕人事。終日坐虛堂。南北兩松棚。細細吹清香。堂中無長物。獨置湘竹牀。我睡僕亦休。睡覺誰在傍。起坐拭兩眦。小山鬱蒼蒼。安得烏有生。俱老無何鄉。

晝寢

倦腕擎書忽墮前。心清無夢腹便便。丹成未要排雲去。且住人間作睡仙。

又

困睡芒羊一欠伸。頽然忽已墮紗巾。鼻端雷動君無怪。路熟華胥不問津。

睡起

睡起偃偃扇。嬾搖枕痕著。面未全消。山丹石竹俱零落。孤蝶飛來伴寂寥。

又 蒲萄換葉欲成陰。歲月催人感慨深。安得門前無俗客。岸巾臨水聽蟬吟。

林間書意

三三兩兩市船回。水際柴門尚未開。垂綠筍梢風正惡。弄黃梅子雨初來。紅螺盃小傾花露。紫玉池深貯麝煤。領取林間閑富貴。向來誤計伴鄒枚。

又

小山草木一窗秋。團扇江山萬里愁。不讀狐書真僻學。未登鬼錄且閑遊。少隨官牒嗟無策。晚脫朝衫喜自由。半嶺嘯聲驚阮籍。要知天下有高流。

示子通

吾家太傅後。衿佩盛青青。我忝殿諸老。汝能通一經。學先嚴。詰訓書。要講聲形。夙夜常相勉。諸孫待典刑。追涼小酌

綠樹暗魚梁。臨流追晚涼。持盃屬江月。散髮據胡牀。苦蕒醃齋美。菖蒲漬蜜香。醉來呼稚子。扶我上南塘。

暑夜泛舟

暑氣方然一鼎湯。聊呼艇子夜追涼。微風忽起髮根冷。闕月初升林影長。漸近場中聞笑語。卻從隄外看帆檣。超然自適君知否。身世從來付兩忘。

又

烈暑元知不可逃。天將清夜付吾曹。小舟行處浦風急。健鶻歸時山月高。愚智極知均腐骨。利名何啻一秋毫。等閑分得吳松水。安用并州快剪刀。

短歌行

冠一免。不可以復冠。門一杜。不可以復開。山林兀兀但俟死。臺省袞袞吁可哀。巨材倒壑亦已矣。萬牛欲挽真難哉。阿房銅人其重各千石。回首變化爲風埃。吾曹浮脆不自悟。乃欲冠劍常崔嵬。勸君飲勿用盃酌。但當手提北斗魁。挹乾東海見蓬萊。安用俛首爲低摧。

小江

細霧斜陽一片秋。數家茅屋小江頭。鶻聲遠入菰蘆夾。鳥陣斜飛蘭杜洲。暫住便成閑嘯詠。欲歸更復小遲留。老翁脚力猶能健。明日重來倚寺樓。

歸興

輕雷輕輓斷梅初。殘籜縱橫過筍餘。鄉語謂梅雨有雷爲斷梅。又謂筍出林爲過筍。飽有期程新買犢。睡無厭足久捐書。白蘋滿渚閑揮榜。綠樹連村獨跨驢。夏日儘長歸亦暮。水邊燈火已疎疎。

又

古道迢迢人跡稀。羸驂欹帽遠村歸。正看日暮羊牛下。又見月明烏鵲飛。僧院疎鐘出林岫。漁家微火耿窗扉。閑遊要是幽人事。草露從教溼短衣。

自春來數夢至閩中蒼溪驛五月十四日又夢作兩絕句記之

騎驢夜到蒼溪驛。正是猿啼月落時。三十五年如電掣。敗牆誰護舊題詩。

又

亭臯敗葉先秋實。城上驚烏半夜啼。自笑遠遊心未已。年來頻夢到蒼溪。

自嘲

長日淡無事。虛堂來遠風。愛眠從病塞。厭事懶治蠶。猫健翻憐鼠。庭荒不責童。爾來添目暗。又免送歸鴻。

又

身臥孤村日。年當大耋時。貧憂償酒券。懶悔許僧碑。輸稅質耕犢。飯醫烹伏雌。勞生不須歎。隨事且支持。

雨霽

一雨洗炎蒸。危闌偶獨憑。涼颺生萃蔡。爽氣入鬢髻。庭下宵遊燐。盤中晝掃蠅。絕勝塵土裏。馬上嚼寒冰。

大雨

萬壑風聲遠。千林雨脚長。溝盈懸鬢竈。屋漏徙衣囊。未說豐年喜。先便永夜涼。清秋病小愈。起柁上瀟湘。

社飲

世上升沉一轆轤。古來成敗幾樗蒲。試看大醉稱賢相。始信常醒是鄙夫。淵明詩云。一士常獨醉。一夫終年醒。起舞非無垂白伴。暮歸仍有鬢髭扶。卽今不乏丹青手。誰畫三山社飲圖。

采藥有感

兼葭記霜露。蟋蟀謹歲月。古人于物理。瑣細不敢忽。我少讀蒼雅。衰眊今白髮。中間嬰疾疾。過日常卒卒。

潤毛春可求。山藥秋可掘。雖云力探討。疑義未免闕。屏居朋友散。奧妙誰敢發。窮理已矣夫。置績當自罰。觀邸報感懷

六聖涵濡壽域民。老年肝膽尙輪囷。難求壯士白羽箭。且岸先生烏角巾。幽谷主盟猿鶴社。扁舟自適水雲身。卻看長劍空三歎。上蔡臨淮奏捷頻。

送子適至梅市而歸

梅市長隄愴別情。魯墟歸路當閑行。日沉菱浦看魚躍。煙合菰叢聞獺鳴。蘸水門扉初半掩。擁橋炬火已先迎。停橈不奈清愁得。獨倚闌干待月明。

述閑

披衣按屨龜據榻。欠伸餘香煖翻心字。茶凝出草書。客稀門每閉。意悶髮重梳。賴有益山樹。幽情得少據。

幽居

謝病言歸一鹿車。短籬數掩護幽居。樹枝南畔有飛鵲。蓮葉東邊多戲魚。倦枕續成驚斷夢。斜風吹落讀殘書。興來偶曳枯筇出。父老逢迎卻未疎。

午暑

笛材織簟涼如水。霧縠縫幙薄若空。更著高安竹根枕。不妨專享北窗風。

舟過道士莊

江蘿芳杜滿沙汀。道士莊前酒半醒。上下風煙還竟日。往來魚鳥各忘形。歸人薄晚常爭渡。病葉先秋亦

自零興欲盡時猶小住。北村漁火看青燐。

晨興

晨興未櫛盥。扶杖並檐立。斷雲方東行。庭草露猶溼。朝飢神益爽。清虛自來入。可憐數雞雛。隨母啄遺粒。蝶殘蚍蜉喜。鼠腐鴟鴞集。吾當一洗之。漱泉開玉笈。

對酒

斷簡殘編不策助。東臯猶得肆微勤。榮枯一枕春來夢。聚散千山雨後雲。煙水幸堪供眼界。世緣何得累心君。牀頭小瓮今朝熟。撥置閑愁且一欣。

泛舟

水長芳洲沒。風生釣艇橫。偶尋東埭去。卻作北村行。宿鳥昏方定。流螢雨更明。歸來未覺晚。傳漏下重城。

地僻

地僻臨湍瀨。門幽長綠苔。客書疑誤達。僧刺媿虛來。清露蘋花坼。斜陽燕子回。自憐猶有恨。佳日對空罍。

東軒

終日在東廂。閑消百刻香。一枰分黑白。雙硯列朱黃。荷氣侵簾馥。桐陰覆井涼。前知今夕夢。孤榜上瀟湘。

季夏雜興

蟻鬪知將雨。蟲鳴覺近秋。衰翁非愛酒。無計奈孤愁。

又

巉巖瘦驢嶺。莽莽老牛陂。嶺在施黔間。陂在汝州。四海均羈旅。何人感此詩。

又

熟睡一炊頃。清談數刻間。未言能近道。要得暫身閑。

又

疏泉澆藥壠。枕石聽松風。此樂慚專享。無因與客同。

夏夜暑毒不少解。起坐庭中。

窗間有螢過。枕上見星流。欲睡不堪熱。長歌起飯牛。

又

風從高樹下。蟲抱短莎鳴。小據胡牀坐。還扶拄杖行。

素飯

放翁年來不肉食。盤箸未免猶豪奢。松桂輒炊玉粒飯。醯醬自調銀色茄。時招林下二三子。氣壓城中千百家。緩步橫摩五經笥。風爐更試茶山茶。曾樂道近餽茶山茶。

老態自遣

似見不見目愈衰。欲墮不墮齒更危。誰令汝年八九十。常欲強健寧非癡。目昏大字亦可讀。齒搖猶能決滯肉。若知用短百無憂。此理正如夔一足。矍矍駑駘俱有味。笑侮莫聽傍人喙。但令孫曾能力耕。一飽不妨還美睡。

耒陽令曾君寄禾譜農器譜二書求詩

歐陽公譜西都花。蔡公亦記北苑茶。農功最大置不錄。如棄六藝崇百家。曾侯奮筆譜多稼。儋州讀罷深咨嗟。一篇秧馬傳海內。農器名數方萌芽。令君繼之筆何健。古今一一辨等差。我今八十歸抱耒。兩編入手喜莫涯。神農之學未可廢。坐使末俗慚浮華。

雨夜

羸軀對影愴餘齡。追念平時只自驚。夏木正濃桐葉墜。秋風未起草蟲鳴。蠹魚似是三生業。汗馬難希百世名。時王師方出塞。小雨迎涼何所作。北窗還對短燈檠。

柴門

寂莫柴門不徹扃。槐花細細糝空庭。晚梅摘得鹽供飮。濁酒沽來草塞瓶。病已廢耕拋撥槓。閑猶持釣愛簑簑。經旬莫恨無來客。交舊疎如欲旦星。

賽神

落日林間簫鼓聲。村村倒社祝西成。扶翁兒大兩髦髮。漑水渠成千耦耕。家受一廛修本業。鄉推三老主齊盟。日聞淮穎歸王化。要使新民識太平。

菖蒲

古礪生菖蒲。根瘦節蹙密。仙人教我服。刀匕蠲百疾。陽狂華陰市。顏朱髮如漆。歲久功當成。壽與天地畢。

又

菖蒲古上藥。結根已千年。聞之安期生。采服可以仙。斯人非世人。兩耳長垂肩。松下語未終。竦身上青天。
迂拙

迂拙宜歸早。乘除得死遲。老稀朝市夢。窮足道途詩。譁世無它技。忘懷自一奇。故溪幽絕處。惟許白鷗知。
夏夜

六尺筇枝膝上橫。中庭岸幘聽鼃更。露零金掌漢宮曉。月度銀河秦塞明。菡萏晚花香未減。梧桐病葉墮
無聲。關河又見新秋近。屈指流年一歎驚。

夏末野興

半世天涯倦遠遊。還鄉不減旅人愁。數聲相應鳩呼雨。一片初飛葉報秋。山塢風煙僧院路。河梁燈火酒
家樓。絕知雪鬢宜蓑笠。分付貂蟬與黑頭。

又

漠漠川雲闔復開。天公試手挽秋回。參差小市林邊出。縹緲疎鐘雨外來。土墾飯香供晚餉。布帘字大賣
新醅。歸舟自逐輕鷗去。不用城笳抵死催。

示子孫

茆屋惟須補漏穿。家人衣食亦隨緣。豈容一事相關白。已過傳家十二年。

夜雨

藩籬處處蔓牽牛。薏苡叢深稗穗抽。只道物生常茂遂。一宵風雨又成秋。

劇暑

六月暑方劇。喘汗不支持。逃之顧無術。惟望樹影移。或謂當讀書。或勸把酒卮。或誇作字好。蕭然卻炎曦。或欲溪上釣。或思竹間碁。亦有出下策。買簟傾家貲。赤脚蹋增冰。此計又絕癡。我獨謂不然。願子少置思。方今詔書下。淮汴方出師。黃旗立轅門。羽檄晝夜馳。大將先擐甲。三軍隨指揮。行伍未盡食。大將不言飢。渴不先飲水。驟不先告疲。吾儕獨安居。茂林蔭茅茨。脫巾濯寒泉。臥起從其私。于此尙畏熱。鬼神其可欺。坐客皆謂然。索紙遂成詩。便覺窗几間。颯颯清風吹。

六月十夜風月佳甚起坐中庭有作

曼膚汗雨不勝揮。夜景冷然暫解圍。漱罷寒泉甘齒頰。夢回斜月入窗扉。荷翻小浦孤螢度。露溼危巢倦鶴歸。我亦馭風思遠適。岳陽樓上酌湘妃。

古井

道傍有古井。久廢無與汲。鄰里共浚之。寒泉稍來集。駕言欲漱濯。冀遠塵土襲。躊躇復棄去。綆短安能及。

菴中紀事前輩韻

埽灑一菴躬。瑣細蓬戶朝昏手。開閉荒山斲藥須。長鑷小竈煎茶便。短袂空中咄咄安用書。身外悠悠固難計。山僧野叟到卽留。麥飯葵羹貴能繼。久貧奴婢多散去。豈有跣足并椎髻。負薪長歌過此生。直疑身在鴻荒世。

急雨

觸熱支離老病增。忽看東北片雲興。疾雷載雨輸膏澤。茂樹生風洗鬱蒸。采藥喜逢屺下客。說詩曾對剡中僧。坐令身在羲皇上。繞坐何煩更設冰。

舍東追涼

驕陽收火傘。清露貯冰壺。海湧四更月。風生千頃蒲。歌狂忘老境。意豁失窮途。所恨朋儕盡。無人爲攬鬚。

酒藥

愁憑酒破除。病藉藥枝梧。焦革死已久。宋清今亦無。幽情寄魚鳥。小艇雜菰蒲。海上秋風早。懸知肺渴蘇。

六月十七日大暑殆不可過。然去伏盡。秋初皆不過數日。作此自遣。

赫日炎威豈易摧。火雲壓屋正崔嵬。嗜眠但喜蘄州簟。畏酒不禁河朔盃。人望息肩亭午過。天方悔禍素秋來。細思殘暑能多少。夜夜常占斗柄回。

急雨遽涼

急雨消殘暑。曠然天地秋。露螢矜熠熠。風葉送颼颼。涼簟惟添睡。明河不洗愁。流年又如此。隨處怯登樓。

縱遊深山隨所遇記之

行穿犖确度谿。路跨清溪一木斜。歷盡艱危到平地。壞垣欹屋兩三家。

又

山徑欹危細棧通。孤村小店夕陽紅。竹郎有廟臨江際。木客無家住箐中。

又

道逢山客束荆薪。口眼睚眦略似人。試問村名瞠不語。剗然長嘯上嶙峋。

又

古寺蕭蕭不見僧。飛甍滿屋老梟鳴。空房終夜無燈火。斷木支門睡到明。

感中原舊事戲作

蜂兒園裏香塵細。燕子樓中寶瑟斜。惟有天知太平事。乞傾東海洗胡沙。

小涼

羸軀一夏困沉緜。不在林間卽水邊。高臥已忘浮世事。小涼漸近早秋天。桔槔軋軋鳴幽圃。舴艋遙遙入暮煙。餘日無多那諱得。逢人自笑說明年。

村居

人笑無才自笑狂。槿籬竹塢得深藏。自從病後辜風月。未免愁中讀老莊。行圃數畦秋菜長。泛溪十里晚荷香。叢書坐嬾無由續。且補忠州手錄方。

城東

出郭溶溶細縠波。平生此地幾經過。祭餘野廟啼烏樂。酒賤村墟醉叟多。亭午疎鐘離石佛。斂疎微雨泊曹娥。采蓮艇子愁衣溼。不爲人家惜綠荷。

初秋露坐作短歌

房星縱。心星橫。斗牛闌干河漢明。青天露坐性所樂。不覺庭樹秋風生。秋風搖落君勿悲。明年花開還滿

枝。人生衰謝則已矣。寧復鬢髮童顏時。

池上

旋移吟榻並池橫。欲出柴門復懶行。樹罅忽明知月上。竹梢微動覺風生。貧無醉日惟堅忍。疾遇涼秋亦漸平。二尺燈檠元好在。便思相伴聽蛩聲。

秋稼漸登識喜

門外新場滑似油。早禾已慶十分收。虹霓不隔郊原雨。蝟蝥爭催巷陌秋。人樂風傳迎社鼓。路長水漲采蓮舟。老翁自笑無它事。欲隱牆東學僮牛。

野渡用前韻

十里平沙到渡頭。溪山合向畫圖收。老僧赴供袈裟古。醉叟行歌襦袷秋。斷岸煙迷耕處草。孤村雨送釣時舟。龍泉不斲元無恨。莫放神光上斗牛。

秋後一日風雨

炎歎數日劇。蕩滌及秋初。病葉風吹盡。鳴蟬雨打疎。趁涼謀社酒。乘潤理園蔬。分喜寧無處。蒲中鱣鱖魚。

感事

會事高皇接雋遊。君恩天地若爲酬。濟時已負終身媿。謀已常從一笑休。在昔風塵馳旆置。卽今煙雨暗耕疇。孤愁欲豁寧無地。野店逢僧每小留。

久無客至戲作

瘦影支離雪鬢繁。頻年老病臥孤村。雍容那有客聯騎。剝啄尙無僧叩門。濁酒香浮新社瓮。晚瓜味敵故侯園。茅檐蓬戶風煙晚。小酌欣然對子孫。

乍涼

涼風蘇病骨。搖落起詩情。一病輒數日。幾詩終此生。招呼丹竈客。結束玉霄行。預想溪橋路。三更待月明。

閑趣

絕迹市朝外。結廬雲水間。心平詩淡泊。身退夢安閑。有酒旋尋伴。無門那說關。桐江故不遠。日暮趁潮還。

溪上

溪上秋來風露清。蕭然浴罷葛衣輕。看雲舒卷了窮達。見月虧盈知死生。老去關心惟藥裹。閑中消日付

棋枰。故人書札頻相問。何日芒屨上赤城。

秋詞

東吳七月暑未艾。川雲忽興天晝晦。蔽空雨點弩發機。平地成渠屋穿背。早禾玉粒自天瀉。村北村南喧地碓。大牲如臯酒如江。相喚龍祠作秋賽。

又

八月暑退涼風生。家家場中打稻聲。穗多粒飽三倍熟。車軸壓折人肩頰。常年縣符鬧如雨。道上卽今無吏行。鄉閭老稚迭歌舞。竈釜日糜豬羊烹。

又

虜收功成將整駕。萬頃黃雲收晚稼。公私逋負一洗空。懷抱喜看兒姪姪。從來婚聘不出鄉。長自東家適西舍。年豐人樂我作詩。朝耕夜織誰能畫。

秋思

詩人本自易悲傷。何況身更憂患場。烏鵲成橋秋又到。梧桐滴雨夜初涼。江南江北堦雙隻。燈暗燈明更短長。安得平生會心侶。一尊相屬送年光。

老學菴北窗雜書

本慕修真謝俗塵。中年蹭蹬作詩人。卽今恨養金丹晚。且向江湖把釣緡。

又

偶住人間遂許時。殘骸自笑尙支持。直須消破黃蘗盡。始是浮生結局時。

又

茅齋遙夜養心君。靜處工夫自策勛。正喜殘香伴幽獨。鴉鳴窗白又紛紛。

又

小龍團與長鷹爪。桑苧玉川俱未知。自置風爐北窗下。勒回睡思賦新詩。

又

定交魚鳥欲忘形。獨岸綸巾坐草亭。不恨囊中無赤仄。且欣案上有黃庭。

又

松棚接屋得陰多。石徑生苔奈滑何。盡道疎籬宜細雨。晴時最好晒漁蓑。

又

龜常曳尾豈非樂。鶴已鍛翎徒自傷。造物今知不負汝。北窗夜雨默焚香。

親舊見過多。見賀強健戲作此篇。

偶向人間脫駭機。玉池中夜自生肥。據鞍馬援雖堪笑。強飯廉頗亦未非。道貌安能希粹盎。世緣但可付
猗違。它年不死君須記。會在天津看落暉。元徽之贈老人詩云。天津橋上無人識。獨倚闌干看落暉。

小病兩日而愈

病骨羸然山澤臞。故應行路笑形模。記書身大似椰子。忍事癯生如瓠壺。美酒得錢猶可致。高人折簡孰
能呼。不如淨掃茅齋地。臥看微香起瓦爐。

秋興

脩蔓叢篁步步迷。山村東下近魚陂。釣歸恰值秋風起。棋罷常驚日景移。病葉辭枝應有恨。候蟲吟壁故
知時。殘年我亦悲搖落。薄暮空囊又有詩。

又

八十仍當過二時。加餐安寢豈前知。晨梳脫髮雖無數。社瓮新醅已有期。偶爲買花經廢圃。時因蹋藕下
清池。尙餘一事終關念。安得兒孫少別離。

日用

舊好疎毛穎。新知得麴生。幽居無一事。枕臂聽松聲。

又

春穀灌園蔬。日長閑有餘。何妨忍揮汗。合藥施鄉閭。

又

貧知藜糝美。渴愛粟漿酸。食少從奴去。人稀苦屋寬。

又

空舍封書篋。多年飽蠹魚。還家貧不死。讀盡舊藏書。

卷第六十八

七月十一日見落葉

葉彫非一日。盛夏則已然。一葉復一葉。及此搖落天。晨起坐堂上。散若飛鳥翩。昔時可藏鴉。今欲不庇蟬。顧視庭中草。亦復非阡眠。百穀秋皆成。是謂造化權。豈爲草木計。而欲求兩全。物理貴見微。勇退差爲賢。

龜堂一隅開窗設榻爲小憩之地

栢欄簷蔔障斜陽。旋置臨階八尺牀。小展窗扉無大費。略加苦蓋有餘涼。老來愈覺歲時速。夢裏不知途路長。試問神遊向何處。月明揮榜上瀟湘。

南門晚眺

奚奴前負一胡牀。門巷楸梧已漸黃。不歷塵埃三伏熱。孰知風露九秋涼。蕭蕭浦溆漁歌晚。漠漠陂塘稻穗香。勿恨行雲吞素月。夢回正愛雨淋浪。

進德

進德工夫在日新。正如更歷自知津。迷時誤認毒爲藥。定後始知天勝人。四壁不妨身落魄。萬夫誰敵膽輪囷。遺經在匱君毋厭。燈火青熒漸可親。

次韻邢德允見贈

人間榮瘁固難窮。歲月推遷卽老翁。馬駿初非凡眼識。源深終與大川通。細思渭北希高價。終勝淮南誦發蒙。莫學三山頑鈍叟。一生空耗太倉紅。

秋懷

居在三家聚。門纔一木橫。用寬緣歲樂。斂薄爲時平。疎樹葉遲落。遠村燈更明。題詩雖草草。亦足寫幽情。

又

村晚歸牛下。林昏宿鳥喧。微升天際月。半掩水邊門。衣杵悲邊信。漁歌斷客魂。老人交舊盡。此意與誰論。

又

客思殘荷外。農功晚稻前。祭多巫得職。稅足吏無權。浦溆家家釣。村墟點點煙。歸舟葛衣薄。始覺是秋天。

又

典琴沽市釀。賣劍買吳牛。雞黍隨時具。江山到處留。隨僧日一浴。笑吏月三休。安得沅湘客。相從賦遠遊。

又
心常疑不動。形要小勞之。活火閑煎茗。殘枰靜拾棋。曬書朝日出。丸藥晝陰移。意適還休去。悠然到睡時。

又
曩得治中俸。湖山偶卜居。身嘗著禾譜。兒解讀農書。遇事絕欣厭。接人均戚疎。乾坤雖浩浩。等於一蘧廬。

又
秋暑雖猶在。晨興氣已清。蠻童掃荒徑。獠婢滌空鐺。病樹有凋葉。殘蟬無壯聲。書生守故態。已復理燈檠。

又
種樹清陰滿。鈔書蠹字穿。老身猶在世。屈指不知年。棄紙儲詩稿。長筒聚藥錢。一生如一日。正可付之天。

又
望遠目猶明。登高腳更輕。每思遊赤壁。時夢上青城。燈下書如蟻。花前飲似鯨。古仙曾歷考。強半出儒生。

又
昨者風雨過。浩然天地秋。年光雙雪鬢。生計一漁舟。賣藥來查浦。聽猿到沃洲。平生畏暑毒。八月記初遊。

出遊

來往人間不計年。一枝筇竹雪垂肩。掃除身外閑名利。師友書中古聖賢。支遁山前饒石水。葛洪井畔慘風煙。小癡大黠君無笑。買斷秋光不用錢。

又

行路迢迢入谷斜。繫驢來憩野人家。山童負擔賣紅果。村女緣籬采碧花。篝火就炊朝甑飯。汲泉自煮午甌茶。閑遊本自無程數。邂逅何妨一笑譁。

東窗獨坐書懷

秋豪外物不關心。竹塢梅村惜未深。蓬戶夜涼燈煜爚。盆山雨潤木蕭森。潔齋入靜三熏沐。宴坐降魔七縱擒。但恨圖書闕調護。不勝鼠齧與蟲侵。

書歎

齊民困衣食。如疲馬思秣。我欲達其情。疎遠畏強聒。有司或苛取。兼并亦豪奪。正如橫江網。一舉孰能脫。政本在養民。此論豈迂闊。我今雖退休。嘗綴廷議末。明恩殊未報。敢自同衣褐。吾君不可負。願治甚飢渴。

荷鋤

五畝畦蔬地。秋來日荷鋤。何曾笑爾輩。但覺愛吾廬。膽怯沽官釀。睡昏讀監書。區區尙多事。未解雜樵漁。

病臥

老境偏饒臥。秋天不肯晴。愁憑書解散。病仗藥支撐。果熟烏鳥樂。村深雞犬聲。邊頭定何似。頗說募新兵。

秋夜獨坐聞里中鼓吹聲

收盡浮雲見素娥。青天脈脈映明河。時平里巷吹彈鬧。歲熟人家嫁娶多。高會不知清夜永。散歸想見醉顏酡。小窗燈火晶熒處。也有人廣七月歌。

老歎

老翁終日飽還嬉。常拾兒童竹馬騎。食爲齒搖艱咀嚼。冠因髮少易傾欹。烏烏歌罷人誰問。咄咄書成自不知。堪笑殘生似蒲柳。秋風未到已先衰。

草堂

南出湖壩有廢堤。草堂只在鶴巢西。清風滿榻眠初起。落葉平溝路欲迷。新酒已知迎社熟。秋鶯猶作傍簷啼。鄰翁相遇饒言笑。共喜年豐米價低。

齋中讀書罷有感

少時學問苦匆匆。絃誦光陰轉手空。聖域淵源雖自力。故交零落與誰同。荒村莫恨身垂老。後世元知論自公。但掩齋扉憑曲几。忘憂正在寂寥中。

雨欲作步至浦口

雨作千山暗。風來萬木號。放懷忘世事。徐步出亭臯。野處惟知遜。心期不復豪。宋清捐善藥。須買遺絺袍。寧乞陶翁食。難舖楚客糟。精心窮易老。餘力及莊騷。杖屨時行樂。鋤耰慣作勞。正令朝夕死。猶足遂吾高。

鏡湖有烏名水鳧鳴於春夏間若曰打麥作飯偶有所感而作

人生天地中。賦子各有限。所享過所賦。鮮不貽後患。玉食害而家。此語禹所難。麥飯勿謂薄。耕時泥及胼。土墾竹爲挾。鹽酪調藜苳。吾媿人豈知。尙以陋見訕。恨亦見事遲。失腳墮名宦。千載梁伯鸞。巍然言無間。

自述

早畏危機避巧丸。長安未到意先闌。心如老馬雖知路。身似鳴蛙不屬官。閑駕柴車無遠近。旋沽村酒半

甜酸羣兒何足勞。情恕胸次從初抵海寬。

秋興

晨興秋色已淒淒。啾啾猶聞隔浦雞。說與應門謝來客。要乘微雨理蔬畦。

又

村酒甜酸市酒渾。猶勝終日對空樽。茅齋不奈秋蕭瑟。蹋雨來敲野店門。

又

困儲赤米枝梧飯。篋有青氈準擬寒。政使堆金無處用。不須常貯一錢看。

又

病起殘骸不自支。旋烹藜粥解飢羸。一編蠹簡青燈下。恰似吳僧夜講時。

又

莫笑門庭草棘荒。也能隨事答年光。半瓶野店沽醇碧。一畚鄰園餉矮黃。

又

白頭韭美醃蠶熟。頰尾魚鮮斫鱸成。卻對盤殮三太息。老年一飽費經營。

又

淹速從來但信緣。襟懷無日不超然。喚船渡口因閑立。待飯僧牀得暫眠。

又

懲羹吹藎豈其非。亡羊補牢理所宜。白頭始訪金丹術。莫笑龜堂見事遲。

又

赫赫能令京兆死。沾沾正坐魏其愚。何如陸子山行樂。臚膊常懸酒一壺。

又

放翁老矣欲何之。采藥名山更不疑。但入剡中行百里。姓名顏狀有誰知。

又

樵客高僧兩斷蓬。偶同煙榜泛秋風。栖賢雪夜匆匆別。豈意相逢在剡中。

又

鼙鼓華鯨響寺廊。殘蕪落葉弄秋光。蹇驢繫著門前柳。閑覓題名拂敗牆。

秋夕書事

秋夕初多露。漁家半掩扉。鵲飛山月出。犬吠市船歸。影瘦悲形瘁。冠偏感髮稀。眼中無宿土。老我欲疇依。

又

寂寂青楓岸。蕭蕭白版扉。端居常懶動。偶出卻忘歸。時秦徵科簡。師還驛置稀。江村日無事。煙火自相依。

薄粥

薄粥枝梧未死身。飢腸且免轉車輪。從來不解周家意。養老常須祝餓人。

拄杖

吾嘗評拄杖。妙處在輕堅。何日提攜汝。同登入峽船。

小築

小築清溪尾。蕭森萬竹蟠。菴廬雖偏仄。庭戶亦平寬。摘果觀猿哺。開龍放鶴盤。澹然還過日。無處著悲歡。

又

小築隨高下。園池皆自然。鋤山得靈藥。斲坎遇寒泉。幽檻花房斂。深林果蒂駢。鄰翁亦好事。相伴送流年。

一編

一編垂首北窗前。皎皎寧常逐物遷。道有廢興何與我。心無媿怍始知天。昔嘗西戍八千里。今復東歸三十年。死去雖無勳業事。九原猶可見先賢。

埭北

煙村湖埭北。魚市廟壩東。急雨時時作。輕舟浦浦通。薪芻聚津口。簫鼓鬧林中。烏柏禁愁得。來朝數葉紅。

風雨

殘暑時嘗盡。清風勢自回。重雲韞日月。大雨挾風雷。老樹不自保。毀巢吁可哀。卻愁新雁到。暮境更禁催。

解嘲

心如頑石忘榮辱。身似孤雲任去留。酒瓮飯囊君勿誚。也勝滿腹貯閑愁。

識喜

本自怕沾京洛塵。固應不吐相君茵。偶逃鼯作鯨吞地。幸保詩狂酒病身。傲世曾歌楚人鳳。著書久絕魯

郊隣山村且試筇枝興。風月秋來正一新。

寓興

窮巷無來客。秋風獨浩歌。壯年閑處老。佳日病中過。甚欲攜長鑿。仍思擁短蓑。逢山皆可隱。不必上三峨。

老馬行

老馬虺隤依晚照。自計豈堪三品料。玉鞭金絡付夢想。瘦稗枯蕒空咀嚼。中原蝗旱胡運衰。王師北伐方傳詔。一聞戰鼓意氣生。猶能爲國平燕趙。

農家

吳農耕澤澤。吳牛耳溼溼。農功何崇崇。農事常汲汲。冬休築陂防。丁壯皆雲集。春耕人在野。農具已山立。房櫓鳴機杼。煙雨暗蓑笠。尺薪仰有取。斷屨俛有拾。洪水昔滔天。得禹民乃粒。食不知所從。汝悔將何及。孩提同一初。勤惰在所習。周公有遺訓。請視七月什。

對酒作

齒落不廢嚼。足跛尙能履。書生之所遭。僥倖有如此。自知窮事業。元不直杯水。徒行若車安。蔬食如肉美。或時得斗酒。亦復招鄰里。不肯歌烏烏。行矣呼起起。

秋分後頓凄冷有感

今年秋氣早。木落不待黃。蟋蟀當在宇。邊已近我牀。況我老當逝。且復小彷徨。豈無一樽酒。亦有書在傍。飲酒讀古書。慨然想黃唐。毫矣狂未除。誰能藥膏肓。

卽事示子邁

四十已悲非少年。耄期何事每歡然。遊山夜雨眠僧院。沽酒秋風上釣船。諸友詩章來疊疊。小兒筆勢亦翩翩。眼邊不是常蕭索。終憶巢居訪老仙。青城上官道人結巢古松杪數十年。

醉中絕句

有山有水登臨地。無病無愁獻傲身。世念秋毫除未盡。麴生應恨白頭新。

又

左殮右粥年年飽。南陌東阡處處閑。幸免催租敗幽興。豈容對酒惜酡顏。

種麥

墾地播宿麥。飯牛臨野池。未能貪佛日。正恐失農時。矻矻鋤耨力。勤勤祝史辭。嘉平得三白。吾飽豈無期。

秋晚

梧桐落井牀。蟋蟀在書堂。徂歲聿云暮。攬衣慨以慷。一生常蹭蹬。萬事略更嘗。賴有銘心語。南華論坐忘。

又

身世呻吟裏。園廬寂寞中。家貧憂酒券。才盡畏詩筒。陂水瀦猶滿。山苗穫欲空。兒孫更力作。勿媿禹遺風。

秋穫後卽事

多稼如雲接百城。村村鼓樂賽西成。頓寬公賦私逋責。一洗兒啼婦歎聲。社酒粥釀供晚酌。秋菰玉潔芼晨烹。放翁醉飽摩便腹。自炙毫甌試雪坑。

又

秋穫春耕力尙餘。雨中襪屨種寒蔬。築居正可茨生草。出市何妨借蹇驢。老境朝晡數匙飯。腐儒生死一編書。敲門忽有嶮山使。慚愧交情未作疎。是日得張季長書。

行飯至湖上

行飯消搖日有常。青鞋又到古祠傍。殘蕪滿路無多綠。落葉投空不待黃。只道詩書能發冢。豈知博籥亦亡羊。此身只合都無事。時向湖橋看戲場。

晨出

味爽睡壓足。起扶藜杖行。關山開曉色。草木度秋聲。市晚船初發。奴勤地已耕。道邊多野菜。小摘助晨烹。

老境

一生幸免踐危機。老境還山飽蕨薇。智士固知窮有命。達人元謂死爲歸。臨窗蜀紙謄詩草。出戶郿條繫褐衣。堪笑街頭小兒女。問予君是伯休非。

憶昔

憶昔梁州夜枕戈。東歸如此壯心何。蹉跎已失邯鄲步。悲壯空傳勅勒歌。今日扁舟釣煙水。當時重鎧渡冰河。自憐一覺寒窗夢。尙想涪溪石可磨。

自嘲

清心不醉猩猩酒。省事那營燕燕巢。惟有著書殊未厭。暮年鐵硯亦成凹。

解嘲

我生學語卽耽書。萬卷縱橫眼欲枯。莫道終身作魚蠹。爾來書外有工夫。

新寒

小雨戒新寒。衡茆已怯寬。飴香炊紫角。門靜挂黃團。扶杖穿茶塢。移舟傍釣灘。欲知秋有信。霜鬢不勝繁。

夜歸

野店晡炊飯。溪橋夜據鞍。天回河絡角。海闊斗闌干。牧舍牛生犢。蔬園犬逐獮。今年時序早。九月已清寒。

夢中作

萬里行求藥。三生誓棄官。鶴巢投暮宿。松夢續朝餐。進火金丹熟。凌風玉宇寒。人間日月速。歲歷又將殘。

自勵

中年已懼小人歸。況是駸駸耄及時。氣惰欲歸思友助。學衰不進賴兒規。無功追媿清時祿。有命何憂晚節飢。羸病今年能未死。潛心更下董生帷。

九月一日未明起坐

病骨清羸八十餘。空齋凄冷五更初。忽聞雲表新來雁。起讀燈前未竟書。坐久屢傳雞喔喔。夢殘猶化蝶蘧蘧。農功漸畢身無事。約束家童種晚蔬。

小疾偶書

書生本願致時康。自怪秋來疾在牀。胸次豈無醫國策。囊中幸有活人方。但知元氣爲根本。正使長生亦

糝糠。豎子何勞一除掃。區區猶欲恃膏肓。

初寒晨起

推枕悠然起。寒燈誰與同。曉窗俄已白。宿火尙能紅。老境呻吟外。年華寂寞中。長飢亦何恨。聊復固吾窮。

霜降前四日頗寒

草木初黃落。風雲屢闔開。兒童鋤麥罷。鄰里賽神回。鷹擊喜霜近。鶴鳴知雨來。盛衰君勿歎。已有復然灰。

題驛壁

輪囷古柳驛門前。糴米歸遲突未煙。隨計入都今四紀。驢寒僕瘦只依然。

閑遊

大冠長劍已焉哉。短褐禿巾歸去來。五世業儒書有種。一生任運仕無媒。麥經小雨家家下。菊著新霜處處開。自笑閑遊心未歇。青鞋蹋碎白雲堆。

貧舍寫興

深山木食猶堪飽。上古巢居亦自安。麥飯草廬吾已過。故應高臥有餘歡。

又

粲粲新霜縞瓦溝。離離寒菜入盤羞。贅童擁篲掃枯葉。曠婢挑燈縫破裘。贅曠皆紀實。

秋晚雨中作

新雁南來歲又殘。蕭蕭風雨暗江干。客疎似悉爾來病。酒薄不禁如許寒。草絡籬頭花尙碧。樹當浦口葉

初丹醉來且擁黃紬睡。莫問何時后土乾。

待旦

晨光殘淡月。急點殺寒更。歷歷記孤夢。悠悠帶宿醒。攬衣推枕起。亂髮遶牀行。歎息人間事。還隨初日生。

夜意

浮雲掃盡天如水。十里疎鐘到野堂。窗紙月明人不睡。屋茅霜冷夜初長。歸休固已師沮溺。承學猶能陋漢唐。安得子孫常念此。不妨世世業耕桑。

湖村

四十來居湖上村。翩翩七見改初元。風梢解籜竹過母。露葉成陰桐有孫。渴鹿出林窺藥井。馴鷗掠水傍棋軒。老人不用誇頑健。時看孫曾浴畫盆。

連夕熟睡戲書

投幘塵機息。捐書困味長。早眠猶有日。晚起已無霜。蝶入三更枕。龜搯八尺牀。昏昏君莫笑。差勝醉爲鄉。

小軒

礎杵聲中去日逾。小軒風露一簾秋。人間走徧心如石。分付寒螿替說愁。

曉寒

悠悠殘夢伴殘更。萬木風號曉氣清。雞唱欲闌聞井汲。月痕漸淺覺窗明。突煙騰碧炊初動。衣焙堆紅火已生。小閣翻書裘褐暖。早朝霜滑媿公卿。

次韻朝陵葉院察時見寄

憶昨翩然別衆仙。秋風吹鬢感凋年。虛齋無復客滿座。敗囊空餘詩百篇。高誼未忘林下約。清吟重結社中緣。不教落在塵埃地。萬頃煙波一釣船。

書意

巢山遠下溼。止酒謝中乾。羸得養生妙。孰能非意干。挂冠身始貴。屏藥疾方安。自笑猶多事。時時把釣竿。

九月下旬卽事

霜晚知麩熟。山寒喜酒釀。黃絲聽夜織。赤米看晨舂。儲藥扶持老。收薪準備冬。兒扶還客拜。顧影歎龍鍾。

城南

城南亭榭銷閑坊。孤鶴歸飛只自傷。塵漬苔侵數行墨。爾來誰爲拂頰牆。

舟中記夢

石帆山下一漁翁。風雨蕭蕭臥短篷。幽夢覺時還自笑。閩州城北看蠶叢。

送周郎

我居山陰古大澤。四顧茫茫煙水白。平時轍跡所不到。玉樹郎君肯來客。衡門僅可俛首過。陋室眞成容膝連。木盤設食菜數箸。共飽知君不予責。期年相從無夜旦。一日復有千里隔。送君津頭淚如綆。老身恨不生羽翮。江湖道嶮非一二。觸處兢畏眞良策。從今日望平安書。我欲燈前手親拆。

村舍得近報有感

莫謂山村僻。時聞詔令傳。寬民除宿負。募士戍新邊。霜重瓦欲裂。月明人少眠。殘年抱遺恨。終媿祖生鞭。

貧歎

老叟年年病。書生世世貧。盜寧窺破橐。雀亦棄空囷。屋壞須撐拄。衣穿厭補紉。今朝風日美。且復過比鄰。

明日復作一首自解

霜寒衣絮薄。日暮爨煙微。冀北馬空老。遼東鶴幸歸。飄零舊交少。衰疾壯心違。每顧兒童笑。吾貧未解圍。

子虞調官行在寓餓團巷初冬遽寒甚作兩絕句寄之

歲晚江湖行路難。一樽何日共開顏。汝方僵臥餓團巷。我亦飢吟飯顆山。

又

知汝彈冠意易闌。苦貧未免覓微官。餓團巷口殘燈火。愁絕霜風十月寒。

卷第六十九

初冬步至東村

八月風吹粳稻香。九月蕎熟天始霜。男耕女饁常滿野。宿麥覆塊皆蒼蒼。豐年比屋喜迎客。花底何曾酒杯迓。家人但覓浩歌聲。不在東阡在南陌。

南門散策

結宇溪一曲。兩山左右之。橫木以爲門。斷竹作短籬。本無剝啄客。門牡固不施。蹙路壞莫補。石罅生棘茨。

野蔓不知名。丹實何纍纍。村童摘不訶。吾亦愛吾兒。

又

槐楸陰最茂。秋晚惟空枝。今日晴無風。散步適其宜。右扶青溪杖。左挾斜川詩。石琢四腰鼓。可以休我疲。清言出正始。不雜世論卑。野僧何處來。成此一段奇。

思北鄰韓三翁西鄰因菴主南鄰章老秀才

韓翁生不識官府。半醉長歌老煙浦。因師老乃學長齋。白飯青蔬自炊煮。二君要是可喜人。未嘗一語欺其鄰。有過無過姑置之。後生孰能如此真。

又

鄉閭耆宿非復前。老章病死今三年。朝來出門爲太息。不見此翁催社錢。我比翁雖差識字。向來推擇嘗爲吏。事功自許無一毫。尙不如翁終日醉。

二毀

茶杯得之久。石硯日在前。一朝忽墜地。質毀不復全。附著以膠漆。入用更可憐。杯猶奉飲歡。硯不廢磨研。向使遂破碎。亦當歸之天。動心則不可。此物何足捐。

大風不能出戶

昨日欲出病見留。今日可出風復作。室虛窗白爐火暖。閉戶幸有圖書樂。一杯淡粥飽則已。下箸豈復思藜藿。山禽念我太寂寥。故作叩門聲剝啄。

晚菊

蒲柳如懦夫。望秋已凋黃。菊花如志士。過時有餘香。眷言東籬下。數株弄秋光。粲粲滋夕露。英英傲晨霜。高人寄幽情。采以泛酒觴。投分真耐久。歲晚歸枕囊。

舍南雜興

浙浙暮風生。暉暉殘月明。開門喜閑望。扶杖得徐行。霜薄樹多綠。泉流溝有聲。兒童殊可念。晝地作棋枰。

又

莎徑依山曲。柴扉並水開。不因行藥出。卽爲覓詩來。戒婢挑蔬甲。催兒斲芋魁。隨宜也能飽。漂母未須哀。

又

麻菽連枝熟。柴荆盡日關。臨池驚鷺起。倚柱待雲還。倦憩石腰鼓。行攜銅博山。老人無定意。所到卽開顏。
石工琢石作杖鼓樣以坐。

自詠

足蹇須人慣。顏衰著鬢多。飯遲惟靜臥。酒至亦高歌。蝗死繁蔬甲。霜清長樂窠。經旬鄰父病。且喜復來過。

又

莫笑幽棲僻。謀生亦未疎。殘困具薄粥。半俸補殘書。均節貧無患。安恬疾可除。雖云苦寒近。隨手蓄薪樗。

風霜

天上風霜慘。人間日月逾。江湖南北雁。原野雨晴鳩。莽蒼新阡陌。凋零舊輩流。惟應赤藤杖。伴我送悠悠。

十月

紅樹平沙十月天。放翁今作水中仙。瑟瑟林外迎神鼓。隻隻溪頭下釣船。世事極知吾有命。俗人終與汝無緣。菊花枯盡香猶在。又付東籬一醉眠。

記夢

久住人間豈自期。斷砧殘角助淒悲。征行忽入夜來夢。意氣尙如年少時。絕塞但驚天似水。流年不記鬢成絲。此身死去詩猶在。未必無人覓見知。

幽興

池水車初滿。荆籬補已成。身閑詩簡淡。心靜夢和平。雁後寒鴉至。楓先柏葉積。居然足幽興。未歎歲嶢嶻。

夜聞雨聲

我似騎驢蓋浩然。帽邊隨意領山川。忽聞風雨掠窗外。便覺江湖在眼前。路過郵亭知幾處。身如估客不論年。未妨賸擁寒衾臥。羸取孤吟入斷編。

訪山家

捨舟步上若耶溪。壽櫟修藤路欲迷。僧院倚山馴栗鼠。野塘漲水下菱雞。草侵古路迢迢遠。雲傍行人故故低。薄暮但尋遺叟去。山家正在鶴巢西。

自法雲回過魯墟故居

枳籬數掩閉柴扉。白碓聲中煙火微。雪暗杜陵無雁下。雲迷遼海有人歸。耕疇且復償初願。官路那知脫

駭機更有冬來歡喜事。芋魁豆兩不勝肥。

旅舍

寺鐘吹動四山昏。繫纜來投江上村。木落不妨生意足。水歸猶有漲痕存。爐紅手暖書差健。鼎沸湯深酒易溫。勿爲無年憂寇竊。狺狺小犬護籬門。

書几試筆

鬢毛蕭颯齒牙疎。九十侵尋八十餘。屋小苦寒猶省火。窗明新霽倍添書。解梁已報偏師入。上谷方看大盜除。藥笈箸囊幸無恙。蓮峯吾亦葺吾廬。偶見報西師復關中郡縣。昔予常有卜居條華意。因及之。

道室偶書

置心常在結繩前。縱未登仙亦永年。秦不及期周過曆。灼然由我不由天。

觀渡江諸人詩

中朝文有漢唐風。南渡詩人尙數公。正使詞源有深淺。病懷羈思亦相同。

村居閑甚戲作

人厭塵囂欲學仙。上天官府更紛然。不如嘯傲東籬下。且作人間過數年。

又

題詩本是閑中趣。卻爲吟哦占卻閑。我欲從今焚筆硯。興來隨分看青山。

夜投山家

驀溝上阪到山家。牧豎應門兩髻丫。葑火正紅煨芋熟。豈知新貴築堤沙。

又

夜行山步鼓鼙鼙。小市優場炬火紅。喚起少年巴蜀夢。宕渠山寺看蠶叢。

又

生草茨廬荆作扉。數家煙火自相依。大兒飼犢舍邊去。小兒捕魚溪口歸。

又

房櫳深深續火明。垣屋蕭蕭鷓鴣聲。作官覓飽最繆算。羨爾爲農過一生。

聞西師復華州

西師驛上破番書。鄠杜真成可卜居。細肋臥沙非望及。且炊黍飯食河魚。

又

青銅三百飲旗亭。關路騎驢半醉醒。雙鷺斜飛敷水綠。孤雲橫度華山青。

舟中

捩柂柯橋北。維舟草市西。月添霜氣峭。天帶斗杓低。浦凍無魚躍。林深有鶴棲。不嫌村酒惡。也復醉如泥。

得趙昌甫寄予及子通詩

去國雙蓬鬢。還山一鹿車。壯慙稽古淺。老悔養生疎。俗態慵開眼。高吟獨起予。青燈對余子。併爲問何如。

飯後登東山

飯已茶未成。褰裳步山徑。雖云筋力衰。持杖猶濟勝。天高樓塔麗。霜落溝港淨。豈惟野實丹。已覺林筍迸。井桐亦強項。葉脫枝愈勁。啼鳥久不去。將無助幽興。盤紆穿翠谷。欹仄下危磴。所嗟無客來。誰與持麈柄。

東村

今日風日和。衰病亦少平。出門無所之。攜幼東村行。吳地冬未冰。濺濺溝水聲。山卉與野蔓。結實丹漆并。雞犬亦蕭散。如有世外情。舉手叩柴扉。病叟喜出迎。從我語蟬聯。未寒疇昔盟。解囊付之藥。與爾偕長生。

石堰村

木落山不蔽。水縮洲自獻。寒日晚更明。村巷曲折見。小婦鳴機杼。童子陳筆硯。農家雖苦貧。終勝異鄉縣。君看宦遊子。豈無墳墓戀。生死在故鄉。切勿慕乘傳。

袖手

袖手地爐傍。身閑日自長。窗明蠹簡字。簾約篆盤香。道士傳琴譜。山僧送藥方。自然塵事遠。不用濯滄浪。

幽居遣懷

大患元因有此身。正須枵腹對空困。扶持接客寧嗟老。質貸迎醫未厭貧。碓下罕遺雞啄粒。席間不掃鼠行塵。時時笑顧兒曹說。縱有煙霄莫問津。

又

斜陽孤影歎伶仃。橫案烏藤坐草亭。閑久更知貧有味。病多那責藥無靈。農書甚欲從師授。忍字常須作

座銘。更喜友生能餉酒。欣然一醉倒長瓶。東陽郭希呂餉石洞酒。

又

習氣深知要掃除。時時褊忿獨何歟。呼童不應自生火。待飯未來還讀書。世態詎堪閑處看。俗人自與我曹疎。作詩未必能傳後。要是幽懷得小據。

湖上晚歸

蓬山再別四經秋。來日翩翩去日遒。無酒可傾殊省事。有詩渾忘亦良籌。梅花遮路如撩客。榭葉飄風已滿溝。湖上榜舟歸薄暮。斜陽紅入寺家樓。

宿村舍

驢瘦童僵小作程。村翁也復解逢迎。霜林已熟橙相餽。雪窖初開芋可羹。土榻圍爐豆楷暖。荻簾當戶布機鳴。解囊自取殘編讀。何處人間無短檠。

村飲

雪前雪後梅初動。街北街南酒易賒。身健不妨隨處醉。有家未必勝無家。

又

醉插江梅老更宜。猶能卜樹揀繁枝。假令住世十小劫。應愛此花無厭時。

食野味包子戲作

珍餉貧居少。寒雲萬里寬。疊雙初中鵠。牢九已登盤。放箸摩便腹。呼童破小團。猶勝瀼西老。菜把仰園官。

醉中作

名醞羔兒坼密封。香粳玉粒出新春。披綿珍饈經旬熟。斫雪雙螯洗手供。吟罷欲沉江渚月。夢回初動寺樓鐘。爐煙裊裊衣篝暖。未覺家風是老農。

感老

人生六十已爲衰。況我頽齡及耄耋。對酒尙如年少日。愛書不減布衣時。遠遊每動辭家興。大藥方從出世師。但向青編觀曩事。英雄何代不兒嬉。

寺壁偶題

斷山支徑得行吟。度磳穿林不厭深。雉挾兩雌飛谷口。烏將數子下牆陰。前三喜接高人語。方寸寧容俗慮侵。少待新春好風日。不妨攜客更相尋。

贈道流

羽人邂逅飲旗亭。自說經年醉不醒。曾伴翰林遊赤壁。仍邀內史寫黃庭。古琴蛇蚶評無價。寶劍魚腸託有靈。太華何時尋此約。九霄風露宿青冥。

冬夕閑詠

柳眼梅鬚漏泄春。江南又見物華新。終年幽興遺身世。半夜孤吟愴鬼神。客有疎親俱握手。酒無賢聖總濡脣。放翁自命君無笑。家世從來是散人。

飯後自嘲

歲熟家彌困。天寒酒闕傾。僅能炊稻飯。敢望糝藜羹。一榻解腰臥。四廊摩腹行。詩人要疎瘦。此日媿膨脝。

感舊

憶昔初乘上峽船。雪灘雲岫過聯翩。忽忽不暇尋高隱。遺恨于今四十年。屬子峽有羅士。

又

雕鞍送客雙流驛。銀燭看花萬里橋。三十三年真一夢。茆簷寒雨夜蕭蕭。

村老留飲

乘興出遊眺。初不言所之。家人固難求。我亦不自知。投杖卻人扶。疾步莫能追。荒寒野廟墮。枯涸漚菅池。過門爭邀留。具食不容辭。濁醪小瓮釀。香飯別甑炊。瓦盆進豚肩。石臼擣花糝。新冬不易見。醉倒理亦宜。舉手謝主人。外強中實衰。一觴可以起。它日更爲期。

醉歌

草書大叫寫成圖。博籥隨聲喝作盧。何似卽今雲海上。千鈞強弩射天吳。

又

百騎河灘獵盛秋。至今血漬短貂裘。誰知老臥江湖上。猶枕當年虎鬪髀。

力耕

力耕歲有一困米。殘俸月無三萬錢。莫怪窮空心不動。正緣愚拙氣差全。學經疊疊懸車後。秉禮拳拳易簣前。猶恨未能忘筆硯。小兒收拾又成編。子適編予詩續稿成四十八卷。卷有百篇。

春近

開禧忽見第三春。身寄楓林野水濱。吾道幸逢天道在。物華又與歲華新。郊原處處堪行樂。道路人人可問津。剩辦青鞵并布襪。若耶已報綠生鱗。

夜坐聞鼓聲

村居樂飲鼓琴琴。亭障無虞歲屢豐。誰道喧呼妨熟睡。老人自愛地爐紅。

小室

地偏焚香室。窗昏釀雪天。爛炊二餽飯。側枕一肱眠。身似嬰兒日。家如太古年。狸奴不執鼠。同我愛青氈。

老景

老死知無日。天公偶見寬。疾行逾百步。健啖每三餐。身瘦短裁褐。髮稀低作冠。年來更小黠。不據伏波鞍。

夜坐

地僻少行跡。屋低便老人。爐紅得清坐。酒綠慰孤斟。吠犬驚飄葉。栖禽換暗林。人間固多難。感慨不須深。

晨起

小疾蠲除盡。閑愁墜闕空。時光雞唱裏。生計碓聲中。戒婢儲猿果。看奴織鶴籠。老人新得道。處處見神通。

貧述

寒生肌粟苦衣單。瘦減頭圍覺帽寬。荒寂在家猶逆旅。窮空養老亦蔬餐。柴青竈突騰煙細。膏盡燈缸照字難。猶喜新醅三斗熟。半窗梅影助清歡。

自述

勃落爲衣隱薜蘿。掃空塵抱養天和。過期未死更強健。與世不諧猶嘯歌。野市蕭條殘葉滿。酒家零落廢壇多。石帆山下孤舟雨。借問君如此老何。

十一月廿七日夜分披衣起坐神光自兩眚出若初日室中皆明作詩志之

靈府無思踵息微。神光出眚射窗扉。大冠長劍竟何有。尺宅寸園今始歸。憂患過前皆夢事。功名自古與心違。三峯二室煙塵靜。要試霜天柳葉衣。

歲暮遣興

昔慕騷人賦遠遊。放懷蜀棧楚山秋。橘中尚可著四老。海外誰云無九州。薄酒時須澆舌本。閑愁莫遣上眉頭。幅巾短褐吾差便。實厭衣冠裹沐猴。

又

病著愁侵併不支。孤村況遇歲殘時。水軒客散成舒嘯。山寺僧來得劇棋。銅鴨香生風嫋嫋。竹雞聲斷雨絲絲。新詩煅煉功何似。問著衰翁自不知。

道室卽事

看盡吳山看蜀山。歸來不減舊朱顏。宣和遺老凋零盡。況說祥符景德間。

又

松根茯苓味絕珍。飯中枸杞香動人。勸君下筯不領略。終作邛山一窵塵。

又

徧遊海嶽卻歸秦。除卻南山萬事新。長劍高車何足道。金人十二也成塵。

又

黃金堆屋無處用。甲第連雲誰與居。莫笑先生無僕馬。風雷萬里跨鯨魚。

泛舟過金家堰贈賣薪王翁

水生浦溆多浮鴨。風急汀洲有斷鴻。渺渺江天無限景。一時分付與樵翁。

又

老人不復事農桑。點數雞豚亦未忘。洗脚上牀真一快。稚孫漸長解燒湯。

又

賣薪自可了鹽酪。治地何妨栽果蔬。我老鈍頑請平半俸。比渠只有不能如。

又

輭炊豆飯可支日。厚絮布襦聊過冬。閭巷家家歌聖澤。子孫世世業春農。

冬晴

歲暮常年雪正豪。今年暄暖減絺袍。春回山圃梅爭發。睡足茆簷日已高。倉庾家家儲舊穀。笙歌店店賣新醪。太平氣象方如許。寄語殘胡早遁逃。

寄隱士

乳竇寒猶滴。巖扉夜不扃。奇書窺鳥跡。靈藥得人形。浩浩天風積。冥冥海氣清。儒逢王內史。更爲乞黃庭。

幽事

老大常愁節物催。東皇又挽斗杓回。江天慘慘不成雪。山驛蕭蕭初見梅。隱士寄雲從地肺。遊僧問路上天台。戲書幽事無時闕。古錦詩囊暮暮開。

去新春纔旬餘霽色可愛

宦遊強半侍僊祠。況是懸車耄及時。厚薄人情窮易見。陰晴天氣病先知。綠樽一醉真當勉。白髮千莖莫自疑。野渡山村梅柳動。身閑何處不熙熙。

作雪遇大風遂晴

雪作風散之。雪止風亦定。霽日上窗扉。明暖起我病。去春財十日。共喜時序正。晨興盥頰罷。白髮滿清鏡。門前無客至。默臥弄麈柄。叢竹如有情。代我發孤詠。

冬夜

我生何多艱。場地皆九折。君恩許歸休。幸與世俗絕。幽居鄰不覲。奚止掃車轍。地爐清夜中。危坐燈欲滅。開門月滿庭。皓皓如積雪。隔溪聞鶴鳴。靈府爲澄澈。

書意

飲酒以散愁。服藥以去病。區區賴外物。豈足語性命。清晨坐堂上。萬事一袖手。愁病初無根。孰謂藥與酒。掀髯笑嵇阮。舉袂謝和緩。氣住則神住。時至骨自換。

又

解牛悟養生。牧羊知治民。通一萬事畢。我每思古人。小園財三畝。手自藝嘉木。先當培其根。又戒無欲速。老松臥澗底。千歲陵冰霜。我豈樗櫟哉。但取無伐傷。

又

唐堯授人時。妙用均造化。我讀七月詩。周室亦其亞。彼用治四海。我斂之一身。至理之所在。太山等微塵。鍊氣以成真。豈復有它術。譬如尊六經。百氏當盡黜。

山房

擾擾人間歲月移。山房幾度換茅茨。身遊與世相忘地。詩到令人不愛時。老鶴初來未丹頂。穉松親種已虬枝。東塗西抹非無意。皴面朱鉛太不宜。

卽事

老來百事似嬰兒。美睡甘餐只自知。陋屋略如營窟世。淳風不減結繩時。

又

鴻冥固自辭繒繳。樗散猶能謝斧斤。況是溪山幽絕地。有人高臥百重雲。

又

閑行靜坐樂誰知。紅飯青蔬美有餘。常笑癡人不更事。時時愁歎欲何須。

又

有人叩戶皆吾友。得屋施牀卽我家。緩步東西行飯耳。元非看竹探梅花。

又

了事如何省事奇。無心始覺有心癡。三更急雨紙窗破。正是擁爐危坐時。

又

高人鬻駱放柳枝。豪士駿馬換蛾眉。人間解事誰如我。小蹇山童自謂宜。

戊兵有新婚之明日。遂行者予聞而悲之。爲作絕句。

送女忽忽不擇日。綵繞羊身花照席。暮婚晨別已可悲。猶勝空房未相識。俗有夫出未返而納婦。謂之空婦房。

又

夜靜孤村聞笛聲。溪頭月落欲三更。不須吹徹陽關曲。中有征人萬里情。

夢中作

野鶴翩僂啄粒微。碧桃縹緲著花稀。海山又見春風到。丹竈苔封人未歸。

啜茶示兒輩

圍坐團欒且勿譁。飯餘共舉此甌茶。麤知道義死無憾。已迫耄期生有涯。小圃花光還滿眼。高城漏鼓不停過。閑人一笑真當勉。小榼何妨問酒家。

雨中示鄰里

寒風吹細雨。白晝見日罕。經旬廢讀書。天豈成我嬾。比鄰各無聊。會面苦不款。未嘗燒茶鑪。而況把酒盃。

高談極奇趣。散去意亦滿。癡黠未易名。要是工用短。

記出遊所見

我行初無折簡招。出門十里未覺遙。憩裝蕭蕭北崦寺。策蹇渺渺西村橋。眉頭那可遣愁到。舌本正要著酒澆。寒風朝作入裘褐。荒祠暮過奠桂椒。平郊煙斂見聚落。細路日落逢漁樵。安得丹青王右轄。爲寫此段傳生綃。

立春前七日聞有預作春盤邀客者戲作

蓼芽蔬甲簇青紅。盤筯紛紛笑語中。一餅不分空恨望。暮年知有幾春風。

春前六日作

夜枕夢回春雨聲。曉窗日出春鳥鳴。典衣沽酒莫辭醉。自有梅花爲解醒。

卷第七十

立春後作

春不遺窮僻。天如念寂寥。鳥鳴知節換。池溜覺冰消。冷糲供新齋。輕裘換故貂。豐年無疾苦。鄰曲遞相招。

舟中

江天雲斷漏斜暉。靡迤羣山翠作圍。帆影似經吳赤壁。鱗聲如下蜀青衣。臥聞裂水長魚出。起看凌風健鶻飛。禹會橋邊最清絕。憶曾深夜叩漁扉。

小園春思

小軒愁入丁香結。幽徑春生荳蔻梢。若論此時吟思苦。縱磨鐵硯也成凹。

又

重臺諼草初離土。百葉緗梅已滿枝。莫道山家殺風景。也能醉倒向東籬。東籬予小園名。

禹祠

祠宇嵯峨接寶坊。扁舟又繫畫橋傍。鼓添滿筴蓴絲紫。蜜漬堆盤粉餌香。團扇賣時春漸晚。夾衣換後日初長。故人零落今何在。空弔顏垣墨數行。

今年開歲三日上元三夕立春人日皆大晴

今年開歲三日上元三夕立春人日皆大晴。今歲晴和歷歲無。江城歌舞溢通衢。天心只向人心卜。不用慇懃問紫姑。

題野人壁

身如魚鳥出池籠。常在陂湖草莽中。簫鼓相聞村社密。桑麻無際歲時豐。市墟買酒何人識。僧閣煎茶欠客同。久欲瀟湘寄清嘯。它年一棹莫匆匆。

小市

春風小市畫橋橫。橋北橋南次第行。絕景惟詩號勍敵。閑愁賴酒作長城。樓臺到處靈和柳。簾幙誰家子晉笙。薄暮歸來漁火鬧。放翁自笑欲忘情。

柳

春來無處不春風。偏在湖橋柳色中。看得淺黃成嫩綠。始知造物有全功。

見事

流光莫恨去聯翩。見事還疑勝昔年。細改新詩須枕上。少留劇飲待花前。陰陰竹塢安茶竈。淺淺蘋汀著釣船。物外家風吾豈敢。散人名號亦充員。

夜雨

江邊依舊釣舟橫。萬事何曾有一成。空憶廬山風雨夜。自吹小竈煮蔓菁。

自詒

一塵東近會稽城。鑿破煙蕪侶侶耕。上藥養神非近效。善言銘座要躬行。論書尙欲心先正。學道寧容氣不平。天付吾儕元自足。滿園春薺又堪烹。

初春幽居

滿榼芳醪手自攜。陂湖南北埭東西。茂林處處見松鼠。幽圃時時聞竹雞。零落斷雲斜鄣日。霏微過雨未成泥。老民不預人間事。但喜農疇漸可犁。

又

小築園林淺鑿池。身閑隨事得遊嬉。幽花折得露猶溼。嘉木移來根不知。小蝶弄晴飛不去。珍禽喜靜語多時。風光未忍輕拋擲。聊付詩囊與酒卮。

自勉

學詩當學陶。學書當學顏。正復不能到。趣鄉已可觀。養氣要使完。處身要使端。勿謂在屋漏。人見汝肺肝。節義實大閑。忠孝後代看。汝雖老將死。更勉未死間。

春遊

梅市移舟過古城。此行亦未闕逢迎。負薪野老無妻子。施藥山人隱姓名。風雨偏宜宿茅店。鹽醃不遣到藜羹。宜和版籍今誰在。似是天教樂太平。

晝坐

早春風雨暗江干。羔酒狐裘不敵寒。輸與蒲龕深袖手。一爐真火養金丹。

正月十六日送子虞至梅市歸舟示子通

策府還山白盡頭。一塵隨分蒼莧裘。看燈雖幸新春健。無食猶懷卒歲憂。稚子與翁俱襤褸。大兒出塞習兜鍪。它時別作謀生計。賣藥惟當學伯休。

聞百舌

春鳥雖僂言。春盡能齧舌。秋蚓與寒蟬。亦各知時節。微物顧能此。人乃獨不然。君看甘陵黨。作孽非由天。

畜一雞報曉聲清圓而鳴每晚戲書絕句

雞鳴平旦未爲遲。恰是山房睡覺時。著屐起尋溪上路。野梅猶有未殘枝。

書村落間事

東巷南巷新月明。南村北村戲鼓聲。家家輸賦及時足。耕有讓畔桑無爭。一村婚媾皆鄰里。婦姑孝慈均

母子兒從城中懷肉歸。婦滌鑿釜供刀匕。再拜進酒壽老人。慈顏一笑溫如春。太平無象今有象。窮虜何地生煙塵。

行歌

孤村小市負薪歌。造物其如此老何。靈藥已能驅疾豎。醇醪不用戰悲魔。

開歲頗思江湖遊適

健筆當年賦遠遊。卽今局促但堪羞。雖爲月下孤舟客。未醉天涯七澤秋。丹熟竟當金換骨。客來從笑雪蒙頭。龍泉本約同歸隱。肯爲春耕欲換牛。

憶昨

入蜀還吳迹已陳。蘭亭道上又逢春。諸君試取吾詩看。何異前身與後身。

又

當年落魄錦江邊。物外常多宿世緣。先主廟中逢市隱。丈人觀裏識巢僊。瓊道人賣藥成都市。中。巢僊謂上官先生。

又

萬里曾爲汗漫遊。豈知白首弄漁舟。會騎一鶴凌風去。何處人間無酒樓。

排悶

抱耒返東臯。初非憚作勞。飢寒凍未免。老病適相遭。開卷無如嬾。飛觥豈復豪。不辭窮到死。猶足竊名高。

識喜

齒搖徐自定。髮脫卻重生。意適簪花舞。身輕捨杖行。僧招決棋戰。客讓主詩盟。尙欲瀟湘去。煙帆不許程。

枕上作

謝事還家一老農。悠然高臥聽晨舂。雖無客共樽中酒。何至僧鳴飯後鐘。采若未能浮楚澤。思鱸猶欲釣吳松。自餘萬事慵開眼。知結宗門案幾重。

近村

去去柴車十里中。竹林密處路纔通。漸聞水磴知村近。遙望禾囷喜歲豐。漁艇往來春浪碧。人家高下夕陽紅。百錢又向旗亭醉。自笑吾生亦未窮。

讀史

人間著脚盡危機。睡覺方知夢境非。莫怪富春江上客。一生不厭釣漁磯。

又

榮悴紛紛醉夢中。轉頭何事不成空。全家采藥鹿門去。我憶襄陽龐德公。

羸臥

羸臥將如老景何。小園風月且婆娑。茶因春困論交密。酒爲家貧作態多。馬上元無聽雞句。原頭那有飯牛歌。自憐遠屏猶多事。賣藥歸來買釣蓑。

春感

老厭紛紛嬾入城。長亭小市近清明。隨頭下漏初芸草。陌上吹簫正賣錫。多病更知生是贅。九原那恨死無名。但餘一事猶關念。萬里唐安闕寄聲。張季長久不通書。或傳其臥病甚耿耿也。

八十三吟

石帆山下白頭人。八十三回見草春。自愛安閑忘寂寞。天將強健報清貧。枯桐已爨寧求識。弊帚當捐卻自珍。桑苧家風君勿笑。它年猶得作茶神。

小園花盛開

厭住愁城徒醉鄉。春風也肯到山房。鴨頭綠漲池平岸。猩血紅深杏出牆。淡薄相遭心已嬾。修行無力夢猶狂。更嗟著句多塵思。慙愧溪藤似截肪。

出遊歸臥得雜詩

江天缺月西南落。村路寒雞一再鳴。自笑此身羈旅慣。野橋孤店每關情。

又

江村何處小茅茨。紅杏青蒲雨過時。半幅生綃大年畫。一聯新句少游詩。

又

眼明未了觀山債。力在猶能涉水行。莫笑軒然誇老健。身存終勝得浮名。

又

壯歲經春在醉鄉。老來數酌不禁當。正須獨倚蒲團坐。領略明窗半篆香。

又
兒扶行飯出柴扉。僂僂方嗟氣力微。道側偶逢耘麥叟。倚鋤閑話兩忘歸。

又

久讀仙經學養形。未容便應少微星。一枝新鍛金雅觜。更向名山斲茯苓。

又

薺花如雪滿中庭。乍出芭蕉一寸青。老子掩關常謝客。短蓑鋤菜伴園丁。

又

晚交數子多才傑。誰肯頻來寂寞鄉。但寄好詩三四幅。絕勝共笑億千場。

感舊

自蜀還吳會。先憑劍換牛。掃除狂習氣。謝絕醉朋儔。去死時猶遠。餘生已覺浮。卽今真憊矣。閉戶尙何求。

寄龔立道

龔子吳中第一流。老農何幸接英遊。難逢正似玉杵臼。易散便成風馬牛。清夜話端思滾滾。暮年心事恐悠悠。何由喚得闔門權。一醉千巖萬壑秋。

寓歎

五福惟無富。嗟予得已多。禪房時託宿。酒市每酣歌。詩瘦慵看鏡。棋塵恐爛柯。殘年猶有幾。切莫負漁蓑。

春晚

客夢初回夜漏殘。東村想見杏花繁。未能便逐啼鴉起。自掩屏風護曉寒。

又

湖上春寒雁已歸。宿醒殘夢兩依依。也知晨起元無事。窗白爐紅且攬衣。

幽事

跌宕人間歲月遷。賞心幽事故依然。潮通支浦漁舟活。露溼繁花醉帽偏。才盡賦詩愁壓倒。氣衰對弈怯饒先。光陰風月空如昨。悵望蘭亭祓禊年。

又

塵抱年來盡掃空。柴門幽事與誰同。水生初漲一溪綠。花落已浮千點紅。愁賴囊泉存舊法。予家釀用岐下囊泉麴法。困憑顧渚策新功。故人岷下無消息。尺素憑誰寄斷鴻。謂張季長。

讀李杜詩

濯錦滄浪客。青蓮澹蕩人。才名塞天地。身世老風塵。士固難推挽。人誰不賤貧。明窗數編在。長與物華新。

煙波卽事

短髮垂肩不裹巾。世人誰識此翁真。阻風江浦詩成束。賣藥山城醉過春。

又

煙波深處臥孤篷。宿酒醒時聞斷鴻。最是平生會心事。蘆花千頃月明中。

又

家浮野艇無常處，身是閑人不屬官。但有濁醪吾事足，浮名不作一錢看。

又

落雁沙邊艇子斜，分明清夢上三巴。眼明一點炊煙起，不是漁家卽酒家。

又

雕胡炊飯菱荷衣，水退浮萍尙半扉。莫爲風波羨平地，人間處處是危機。

又

夢筆橋邊聽午鐘，無窮煙水似吳松。前年送客曾來此，惟有山僧認得儂。

又

浪迹人間數十年，紹興間自剡中入天台。始有放浪山水之興，年年散髮醉江天。岳陽樓上留三日，聊與瀟湘結後緣。

又

煙水蒼茫絕四鄰，幽棲無地著纖塵。蕭條雞犬楓林下，似是無懷太古民。

又

歸老何須乞鏡湖，秋來日日飽尊鱸。正令霖雨稱賢佐，未及煙波號釣徒。

又

父子團圓樂到死時，漁家可樂更何疑。高文大策人皆有，且聽煙波十絕詩。

茅舍

茅舍晨雞復暝鴉。暮年別自是生涯。貪眠久已遺人事。對酒猶能惜物華。出有兒孫持几杖。歸從鄰曲話桑麻。日長亦莫憎春困。小竈何妨自煮茶。

子遙入城三宿而歸獨坐悽然示以此篇

吾兒早自立。所懼非飢寒。我歸自仙蓬。再疏請桂冠。明恩華其行。汝亟忝一官。得祿寧甚遠。懼違菽水歡。我年且九十。亦覺去汝難。生死要相守。豈憚聯征鞍。但恐老益衰。千里愁關山。官期猶累歲。言之已辛酸。村醪瀉盎盆。山果亦滿盤。春風吹桃李。一笑且團圓。

暮春新路至湖上示元敏

時雨作未成。蒸溽思出門。湖塘直東西。行人各歸村。翻翻鳥投林。杳杳鐘鳴昏。羊牛爭迳路。煙火出短垣。吾兒望未到。誰與共盤殮。幽獨多惻愴。且復攜斯孫。歸來蓬窗下。聊可與晤言。

閱雨

臘雪不濡土。春風吹早塵。東吳貴粳稻。布種當及晨。千里方翼翼。坐視膏澤屯。民孽實自作。所賴天公仁。何時見秋穫。如山築高囷。

春和初遷坐堂中

九月天始霜。澤中多烈風。東廂尋丈地。聊以安我躬。薪炭南山來。地爐晨暮紅。二月春始和。如蟲思舊蟄。草堂雖褊小。門戶隨事葺。闢窗對小山。峯嶂爭案岌。筆硯陳橫几。圖書羅矮牀。頡頏燕雀聲。左右蘭茝芳。

有時苦頑痺。杖藜寄相羊。折花與弄水。自適亦何常。

春晴暄甚花開略無餘矣賦以寓感

常年看花時。輒苦風雨厄。今年獨異此。遊人滿阡陌。翩翩出聯騎。往往醉墮幘。轉盼桃杏空。遂見辛夷坼。海棠尤可念。不耐暖日炙。臙脂成白雪。其意亦自惜。曾未淹旬時。春事欲掃迹。安得愛花心。堅頑如鐵石。

春晚

南陌東阡自在身。黃塵不污接羅巾。無方可染星星鬢。有酒能留盎盎春。下歧已添蓴菜美。啣泥又見燕巢新。作公何益辛毗事。且是人間九十人。

春陰溪上小軒作

午醉初醒倚釣軒。悠然無與共清言。風微僅足吹花片。雨細纔能見水痕。杳杳暝鐘浮遠浦。離離煙樹識孤村。故人萬里岷山下。安得書來慰斷魂。比遣書問張季長。消息於都下。未報。

散策至湖上民家

曳杖翩然入莽蒼。人間有此白雲鄉。風傳高樹珍禽語。露溼幽叢藥草香。農事正看春水白。客途漸愛午陰涼。餘年且就無羈束。社鼓琴琴樂未央。

枕上聞雨聲

小雨廉纖不濡土。忽聞簷溜喜無窮。斷知不作西山餓。多稼如雲在眼中。

聞里中有鬪者作此示之

老翁無所長。惟是更事多。生世與人處。烏可傷至和。秋毫不能忍。平地尋干戈。唾面聽自乾。彼忿自消磨。鄉鄰皆世舊。何至誓弗過。勗哉養子壽。它年住雞窠。

春寒

漁艇水流去。柴門風自開。餘寒爲醉地。多病作慵媒。莎草鋤還出。鷗羣去復來。流年殊袞袞。殘鬢不禁催。

石帆山下

久矣移家住鹿門。偶然信脚到桃源。尙嫌名挂東林社。那問塵生北海樽。才盡極知詩草草。睡多常覺氣昏昏。舊聞福地多靈藥。安得高人與細論。

餘寒

漠漠餘寒透客衣。江村倍覺失春期。頽頽燕比常年晚。開落花爭數日遲。

自九里平水至雲門陶山歷龍瑞禹祠而歸凡四日

桐帽絕裘擁半酣。肩輿軋轉城南。牛過野水將新犢。女采柔桑起稚蠶。遺老年光重九十。故鄉春事及重三。種花築室知難辦。借地猶能結草菴。

又

細雨如絲映晚暉。店家小憩換征衣。春農耕罷負犂去。村社祭餘懷肉歸。黃犢自依殘照臥。白鷗爭傍小灘飛。道邊舊識凋零盡。誰記遼天老令威。

又

老子無心老尚狂。山榭隨處寄偃偃。雲歸岫穴初收雨。水入陂塘正下秧。野客就林煨燕筍。蠶家負籠采雞桑。遠遊萬里知何樂。卻喜東歸住故鄉。

又

老子山行肯遽回。直穿犖确上崔嵬。未誇腳力如平昔。且喜眉頭得暫開。廟後故梁龍化去。山前遺箭鶴銜來。囊錢已盡君無笑。草草猶能把一杯。

又

我來恰值暮春初。晝漏微長小雨餘。苔蝕秦碑亡舊刻。龍歸禹穴護遺書。燕巢已壘泥猶溼。花片雖殘葉尚疎。到處不妨俱可樂。詩人爲底愛吾廬。

又

輿似雞栖寄兩竿。山程三月尙春寒。麥苗吐穗初成實。梅子生仁已帶酸。買飯猶勝乞墦客。看耕僭學勸農官。還家莫道虛懷袖。筍蕨隨宜亦滿槃。

又

點點桃花糝綠苔。入門倚杖意悠悠。數聲茶飯齋初散。一片溪雲雨欲來。老宿龍鍾嗟獨在。高松磊砢憶新栽。世間萬事俱難料。未死重遊更幾回。

又

我行隨處叩巖扉。覓得生薪旋燎衣。道士已騎鸞鶴去。山僧初自水雲歸。瓮頭酒壓松肪熟。盤裏蔬供藥

秉肥老覺論心須世外。溪陰回首尙依依。龍瑞馮道士。二月中逝去。餘慶澤菴主。自天童歸。亦二月也。

春早得雨

春早得甘澍。村鄰喜欲狂。天公終老手。處處出新秧。

又

稻陂方渴雨。蠶箔卻憂寒。更有難知處。朱門惜牡丹。

春晚

窗戶迎新燕。階除集乳鷗。欲知春已暮。地上亦無花。

又

思與春爲別。忽忽置一樽。明年尙強健。扶杖候柴門。

春晚南堂晨起

秋風樹瘦勁。春露葉扶疎。夙興立堂上。短髮未暇梳。高謝世俗撻。遊於物之初。青黃災斷木。三四調羣狙。長生豈有巧。要令方寸虛。今年幸差健。小雨聊荷鋤。

又

春陽染柳條。春風落花片。化工本無心。誰與催漏箭。俯仰財幾時。梁間有雛燕。人亦隨物遷。蒼然鏡中面。要當心鐵石。先登酣百戰。我豈兒女哉。秋風感團扇。

見鵲補巢賦作

臥看銜枝鵲補巢。方知此老嬾堪嘲。山村四十餘年住。未省曾添一把茅。

予素不工書。故硯筆墨皆取具。而已作詩自嘲。

我昔生兵間。淮洛靡安宅。統髦入小學。童叟聚千百。先生依靈肘。教以兔園冊。僅能記姓名。筆硯固不擇。竈煤磨斷瓦。荻管隨手畫。稍長遊名揚。麤若分菽麥。偶窺文房譜。雖慕無由獲。筆惟可把握。墨取黑非白。硯得石卽已。殆可供擣帛。從渠膏梁子。竊視笑啞啞。

春晚卽事

桑麻夾道蔽行人。桃李隨風旋作塵。煜煜紅燈迎婦擔。皤皤畫鼓祭蠶神。

又

小時抵死願春留。老大逢春去卽休。今歲禹祠纔一到。安能分日作遨遊。分日作遨遊。王摩詰詩也。

又

漁村樵市過殘春。八十三年老病身。殘虜遊魂苗渴雨。杜門憂國復憂民。

又

龍骨車鳴水入塘。雨來猶可望豐穰。老農愛犢行泥緩。幼婦憂蠶采葉忙。

懷昔

高皇市網收風鱗。我得定交猶數人。陳山清真王逸少。李石風流賀季真。

書感

一是端能服萬人。施行自足掃胡塵。南州不可無高士。東國何妨有逐臣。

夜中獨步庭下

山月明如畫。江風冷借秋。衰遲亦可歎。幽獨自成愁。斗柄垂江渚。笳聲下戍樓。我惟詩思在。從此亦宜休。

卷第七十一

憶昔

憶昔紹興中。東帶陪衆彥。沐浴雨露私。草木盡葱蒨。一朝窮達異。相遇忘慶唁。遠官楚蜀間。寂寞返鄉縣。於時同舍郎。貴者至鼎鉉。數奇益自屏。短褐失貧賤。俯仰五十載。未媿金百鍊。忍飢菰蘆間。生理僅如綫。窮交誰耐久。晨暮一破硯。獻歌楓林下。萬事付露電。惟有孤舟興。所至多勝踐。衡茅無定止。何處非郵傳。炊煙起沙際。跳魚裂波面。嘔啞緯車鳴。隱翳漁火見。簫鼓樂水神。鐘梵鬧竹院。我詩雖日衰。得句尙悲健。巍巍闕里門。未嘗棄狂狷。放浪終餘年。造物不汝譴。

雜詠

仕困風波歸可樂。生如疣贅死何悲。極知此手終無巧。那得隨人儘作癡。

又

鏡中顏狀年年改。海內交朋日日疎。一慟寢門生意盡。從今無復季長書。近聞張季長物故。

又

女郎花樹新移種。官長梅園亦探租。作盡人間兒戲事。誰知空囊一錢無。鄉人謂楊梅止曰梅官長其高品也。

又

一日日窮窮不醒。一年年老老如期。黃河卻有逢清日。白髮應無返黑時。

又

世間萬事本悠悠。自古詩人易白頭。莫羨老夫垂九十。一年添得一年愁。

又

夸士騎牛著鐵冠。往來城市擁途觀。爭如老子無奇怪。惟是蓑衣伴釣竿。

又

家圃菜肥忘肉食。村場酒美勝官壺。終年醉飽無憂責。莫怪愚公老不枯。

又

官途所至尙偷閑。何況湖邊晝掩關。未愛好風吹醉袖。且貪微雨養盆山。

又

斜風吹雨晚空濛。獨立溪邊兩鬢蓬。便過此生何所恨。百年強半水雲中。

又

病起清臞不自持。紗巾一幅倚筇枝。水沉香冷紅蕉晚。恰似道山羣玉時。

曉思

暮年多感愴。孤夢久不成。殘燈暗無焰。宿雨滴有聲。食少夜常飢。展轉空腸鳴。老雞雖三號。山窗終未明。默誦舊記書。更覺負平生。披衣搔短髮。壯志浩縱橫。

幽居

策府還家又五年。心常無事氣常全。平生本不營三窟。此日何須直一錢。雨霽桑麻皆沃若。地偏雞犬亦翛然。閉門便造桃源境。不必秦人始是仙。

又

橫草無功負主恩。一生強半臥衡門。蠹書身世元無憾。伏櫪光陰不更論。春雨負薪蘭渚市。秋風采藥石帆村。更思旋糴場中麥。暖熱塵埃老瓦盆。

幽居卽事

采藥鹿門山。釣魚富春渚。君看此氣象。何止輩伊呂。直令終不偶。後人會知汝。亦不妨著書。世世祕囊褚。

又

野寺促晨裝。古驛休破橐。雖云行役苦。客子心獨樂。家山幸歸來。未免歎拘縛。安得萬里天。翩然下孤鶴。

又

暮年乞殘骸。窮巷事幽屏。晨興食一簞。有味敵五鼎。終日無再炊。奈此夏晝永。枯腸不禁攪。戒婢罷煮茗。

又

小磴落雪花。修鯁汲牛乳。幽人作茶供。爽氣生眉宇。年來不把酒。杯榼委塵土。臥石聽松風。蕭然老桑苧。

又 日鑄歲幾何。苞苴遍權門。野人求其類。金塿實弟弔。超然高世韻。何獨驅睡昏。安得如吾宗。坐致顧渚園。

又 酒能忘事物。不過在醉時。麴蘖力既盡。萬緒如盡絲。阿堵雅見疎。歡伯難與期。自憐善用短。時誦止酒詩。

又

薰艾割蜜房。荷鋤掘吳朮。誰烹彌明鼎。來薦維摩室。厚味不腊毒。上藥能愈疾。今夕風月佳。良會不可失。

又

古人在山林。躬自事樵汲。我雖迫耄期。勤慎亦在習。掃地拂几硯。何遽力弗給。卻笑杜陵翁。多臥少行立。

又

屏居江海涯。杳杳菰蒲深。俛仰夏令中。澤國正多陰。桑椹熟以紫。水鳥時遺音。偶得一瓢酒。鄰里聊相尋。

醉歸

夜分飲散酒家壚。歸路迢迢月滿湖。小豎竊言翁未醉。入門猶記露菖蒲。

又

烏柏陰中把酒杯。山園處處熟楊梅。醉行蹠蹠人爭看。蹋盡斜陽蹋月來。

書南堂壁

數間破屋住荒郊。暑雨時須自補茅。多病篤章無傑思。長閑樵牧有新交。荒唐但向先師媿。骯髒寧辭薄俗嘲。偶有會心成獨笑。一林春筍放煙梢。

又

心溷元知面合團。愚公骨相卻酸寒。雲山萬疊猶嫌淺。茆屋三間已覺寬。菜長何妨供小摘。花開聊得助幽歡。今朝忽有西村興。著起芒鞋不作難。

五月雨

空濛五月雨。景氣一番新。換盡園林葉。洗空衢路塵。山郵惱行客。野渡滯歸人。獨有龜堂叟。涼風吹角巾。

蠶麥

村村桑暗少桑姑。戶戶麥豐無麥奴。又是一年春事了。纒絲擣麩笑相呼。

早至園中

湖上空濛雨熟梅。清晨岸幘一悠哉。幽花不恨草埋沒。密樹豈知禽去來。舊爲愛茶分水器。近緣炊爨得琴材。小丘僅見山如髻。尙媿韓公八尺臺。

憶雲門諸寺

三百六十日。安可日日愁。四百八十寺。要須寺寺遊。雲門若耶間。到處可淹留。金像闕古殿。霜鐘發重樓。臨澗見魚躍。穿林聞鹿呦。亦有疎豁處。白鷺下綠疇。僧固非盡佳。終勝從公侯。夜闌煎蜜湯。豈不賢盃甌。澤居厭溽暑。慨思風露秋。晴雨俱可人。亦莫占鳴鳩。

贛士曾與宗字光祖以其居篔簹谷圖來求詩

高人心虛萬物宗。家世常以仕易農。買山本愛坡上竹。手種已偃巖前松。瀑泉三伏凜冰雪。谷聲十里酣笙鏞。了知自是一丘壑。不與金精爲附庸。地與金精山青牛峽爲隣。

以菜茹飲酒自嘲

山澤有臞儒。殘年病滿軀。拙疎難救藥。貧困不枝梧。海客留苔脯。山僧餉筍枯。筍枯出仗錫。山。衰顏得村酒。猶解暫時朱。

五月二十一日風雨大作

風雨縱橫夜徹明。須臾更覺勢如傾。出門已絕近村路。對面不聞高語聲。銜舳江關多蜀估。宿師淮浦飽吳粳。老民願忍須臾死。傳檄方聞下百城。蜀盜已平。淮壩胡賊亦遯去。

寄題恬蒼陳伯予主簿平楚亭

琵琶洲上暮山奇。五十餘年役夢思。與子定交雖可樂。念身垂老亦成悲。遠遊倦似風枝鵲。愁思多於繭盎絲。安得往尋平楚約。一樽相屬醉題詩。

卽事

歸臥已如狐首丘。不妨解劍換吳牛。掃空身外閑榮辱。閱盡樽前舊輩流。學道漫希僧坐夏。憂時常媿士防秋。一年曆日開強半。歎息人間歲月遒。

梅雨初霽

梅雨忽已過。松風來颯然。吟多錦囊富。影瘦角巾偏。客祝加餐飯。兒憂少睡眠。衰骸累人久。撫事感餘年。

夏日雜題

東吳五月黃梅雨。南浦孤舟白髮翁。貂插朝冠金絡馬。多年不入夢魂中。

又

午夢初回理舊琴。竹爐重炷海南沉。茅簷三日蕭蕭雨。又展芭蕉數尺陰。

又

新縫細葛作蠶綯。簾展風漪凜欲秋。啼鳥一聲呼夢斷。依然書卷在牀頭。

又

簷前桐影偏宜夏。葉底蟬聲漸報秋。莫道衰翁怯風露。也能覓醉水邊樓。

又

渚蒲經雨送微馨。野鶴凌風有墮翎。歸入衡門天薄暮。清溝淺浸兩三星。

又

一葉兩葉病木實。一點兩點疎螢流。水底星河秋脈脈。髮根風露夜飈飈。

晚興

地荒蓬藿與人齊。局促何曾厭屋低。村市船歸聞犬吠。寺樓鐘暝送鴉栖。山童新斫朱藤杖。僮婢能醅白

苜蓿。政欲出門尋酒伴。霏霏小雨又成泥。

急雨

蝸廬四壁僅容身。赫赫炎曦不貸人。正喜風清三伏暑。已看雨壓九衢塵。寒泉不減中瀟味。貢茗初嘗正焙新。安得凌空雙健羽。徑隨猿鶴上嶙峋。

聽雨

老態龍鍾疾未平。更堪俗事敗幽情。紗幮笛簟差堪樂。且聽蕭蕭暮雨聲。

窮居戲詠

賦分雖云薄。謀生亦自疎。但令書有種。敢恨食無餘。身病慵行立。庭荒廢掃除。寒溫雖泛禮。猶辱問何如。旬日連得二三故人書。

讀窮居五字慨然有感復作一首自解

布褐營身足。茅茨置榻寬。食非依漂母。菜不仰園官。小蹇鞍韉黑。羸僮骨相酸。丹青能寫此。千載尙傳觀。蒙恩封渭南縣伯。因刻渭南伯印。

旋著朝衫拜九天。榮光夜半屬星躔。渭南且作詩人伴。敢望移封向酒泉。唐詩人趙嘏爲渭南尉時。謂之趙渭南。

題門壁

四十年來住此村。勝衣拜起有曾孫。市墟分熟容賒酒。鄰舍情親每饋殮。居似窮邊荒馬驛。身如深谷老桑門。幸知歲惡緣陂廢。安得農官與細論。貢郭及近縣。頗有患水處。

雨霽

雨霽禽魚樂。風生草木香。老鷺時易失。閑覺日偏長。閣閣竈何怒。翩翩蝶許忙。閉門真得計。切勿變軒昂。

西村晚歸

小塢花垂盡。平隄草次迷。日長鶯語久。風定絮飛低。子響聞碁院。舟橫傍釣溪。歸途不知處。依約隸東西。

連日雲興氣濁。雨意欲成。西南風輒大作。比夜月明如晝。

考古

鳩自呼鳴。蚓自歌。二者鄉人以爲雨候。何時甘澍一滂沱。封姨漫妒陽臺夢。卻付長空與素娥。

考古無長晝。憂時少熟眠。偷生迫鍾漏。戰死媿兜韃。莫報乾坤施。空驚歲月遷。藜羹安用糝。吾事本蕭然。

又

殘春無幾述。意試筆書盈紙。烹茶睡解圍。新蔬供冷麵。熟練製單衣。雛燕飛初穩。殘花見漸稀。年衰學不進。默默認吾非。

南堂晨坐

衰疾來無已。流年過若馳。家貧食易美。身老夢常悲。草長增蛙怒。花空失蝶期。不堪多難日。更賦送春詩。

記悔

鏡湖清絕似瀟湘。晨起焚香坐草堂。日暖遊絲垂百尺。花殘新蜜釀千房。綠桑糝箔開蠶食。白水翻車浸稻秧。莫道村翁殺風景。也能沽酒答年光。

我悔不學農。力耕泥水中。二月始穡事。十月畢農功。我悔不學醫。早讀黃帝書。名方手自緝。上藥如山儲。不然去從戎。白首捍塞壘。最下作巫祝。爲國祈豐年。猶勝業文辭。志在斗升祿。一朝陪衆雋。所望亦已足。豈知賦命薄。平地成怨仇。生爲馬伏櫪。死爲狐首丘。已矣何所悲。但悔始謀錯。賦詩置座傍。聊以志吾忤。

東園晚興

宿葉自脫新葉生。東園忽已清陰成。老夫東行復西行。烏藤瘦勁青鞋輕。竹籬羣號似知雨。鶉鴉相喚還疑晴。萋萋幽草上牆綠。瀼瀼細水循堦鳴。蕭然濯手坐盤石。心地平安體舒適。青山缺處紅日沉。杳杳長空送歸翮。

晨起行園中

晨日未出林。庭戶有爽氣。僮奴課薪水。老子自擁篲。稻陂方閔雨。草木亦顛頓。羣蛙汝何心。尙復作鼓吹。

雷雨

雲昏失南山。雷過撼北戶。天其哀此民。畀以三日雨。未言高下足。十已得四五。雨勢殊未已。喜色徧農圃。稽手謁龍公。願言終有秋。民飢不敢辭。懼貽明主憂。

戲書燕几

平生萬事付天公。白首山林不厭窮。一枕鳥聲殘夢裏。半窗花影獨吟中。柴荆日晚猶深閉。煙火年來只
僅通。水品茶經常在手。前身疑是竟陵翁。

又

飽知此手合鋤犁。剩喜東歸老故栖。僧乞新詩題院壁。人扶半醉下樓梯。少通朝籍讒銷骨。晚畏京塵悔噬臍。尚有遠遊心未死。夢攜猿鶴渡敷溪。

喜雨

一雨洗旱塵。吾廬氣疎豁。土潤竹萌出。水長漁舟活。桑麻鬱千里。夾道光如潑。憑高望歸雲。更覺原野闊。沉憂寬旅食。分喜到僧鉢。但仰皇天慈。不必尤旱魃。

閑適

閉門萬事不相關。飽受人間一味閑。琴薦潤生諳雨至。衣篝香冷歎春殘。早曾寄傲風煙表。晚尙鍾情水石間。小市酒旗能喚客。試尋鄰曲共開顏。

早晴

老病常貪睡。蕭蕭厭雨聲。翩然兩烏鵲。爲我報新晴。

翦牡丹感懷

雨聲點滴漏聲殘。短褐猶如二月寒。閉戶自憐今伏老。聯鞍誰記舊追歡。欲持藤榼沾春碧。自傍朱欄翦牡丹。不爲挂冠方寂寞。宦遊強半是祠官。

偶觀舊詩書歎

吾道運無積。何至墮畦畛。醜雞舞甕天。乃復自拘窘。外物豈移人。子願不少忍。鶴井與狐妖。正可付一哂。繁華夢境鬧。零亂空花賈。可憐憨書生。尙學居易積。我昔亦未免。吟哦啄肝腎。落筆過白雨。聚稿森束筍。

幸能悟差早。念念常自憫。安得從碩儒。稽首謝不敏。

聞蜀盜已平獻馘廟社喜而有述

北伐西征盡聖謨。天聲萬里慰來蘇。橫戈已見吞封豕。徒手何難取短狐。學士誰陳平蔡雅。將軍方上取燕圖。老生自憫歸耕久。無地能捐六尺軀。

晚雨

萬里雙芒屨。終年一布裘。病侵消壯志。醉著失閑愁。琴料憑僧問。巢居與鶴謀。晚來疎雨過。探借北窗秋。

雨晴

早曠常思雨。沉陰卻喜晴。放船蓮蕩遠。岸幘竹風清。淮浦戎初遁。興州盜甫平。爲邦要持重。恐復議消兵。

起晚自嘲

辛苦一生何所獲。老向東阡與南陌。頭眩眼暗牙齒疎。能作人間幾時客。爾來偷惰更可笑。臥聽場中打新麥。老雞失旦也似儂。引頸一呼窗已白。

閑中偶詠

斷編殘稿本徒勞。橫得虛名亦已叨。不識狐書那是博。尙分鶴料敢言高。巢山且欲營丹竈。跨海何當看雪濤。與世不諧終自許。笑人苦勸學鋪糟。

又

舉世紛紛名利間。天公偏賦此身閑。塵衣濯罷滄浪水。茅舍歸來會計山。鄰舍擎盤分麥飯。野人曳杖叩

柴關酒逋詩債何時了。未死何妨且旋還。

晚步湖塘少休民家

瓜蔓緣籬竹。蘆芽刺岸沙。橫陂浮雁鷺。古道暗桑麻。適遇扶犁叟。同休織屨家。村童亦可念。喚客手吒叉。

獨酌罷夜坐

不見麴生久。惠然相與娛。安能論斗石。僅可具盤盂。聽雨蒙僧衲。挑燈擁地爐。勿生孤寂念。道伴有狸奴。

雨中出門閑望有作

急雨初來已瀉簷。清香欲散更穿簾。年開九秩尚不死。坐對一編殊未厭。人笑黠癡俱得半。自憐貧病每相兼。說梅古謂能蠲渴。戲出街頭望酒帘。

示二子

豈不懷榮畏友朋。一生凜凜蹈春冰。任真雖笑拘邊幅。達節寧容出準繩。自喜殘年如白傅。更憐諸子慕崔丞。耄期尚有江湖興。頑健人言見未曾。時子龍調官東陽丞。子坦調彭澤丞。

道室秋夜

江上窮秋日。菴中獨夜時。丹靈馭豎子。神定出嬰兒。梁熟猶餘夢。柯摧未畢棋。神仙元可學。往矣不須疑。

又

道室生虛白。仙經寫硬黃。晨杯擊石髓。夜几照松肪。眼力新生犢。心源百鍊鋼。何當登日觀。萬里看扶桑。

醉題

雲棲澗飲未爲高。起舞行歌亦足豪。試問食時觀本草。何如酒後讀離騷。遊山不待飛雙鳥。翦水無因得快刀。熟睡市墟君勿笑。年來隨事學鋪糟。

自詠

忽忽殘年及耄期。清晨對鏡不須悲。遠行久立雖差倦。未到人扶見客時。

又

食飲從來戒失時。衣裘亦復要隨宜。老人最索調停處。正在初寒與半飢。

秋晴

身健心閑百慮輕。秋晴未必減春晴。晨窗暖日烘花氣。午枕微風送鳥聲。韞玉硯凹宜墨色。冷金牋滑助詩情。少年風味嗟猶在。虛道歸休學力耕。

門外獨望

離離遠樹傍煙津。又見清秋一歲新。老眼厭看南北路。流年暗換往來人。鑄金遺像誰能記。執玉來朝適已陳。況我風中斷蓬耳。夕陽空復一傷神。

貧歌

壽居福之首。貧爲士之常。造物賦我貧。乃以壽見償。處常而受福。每恐不得當。掬澗以沃渴。屑柏以爲糧。雖云未免飢。何至死道傍。猶勝遼東丁。化鶴還故鄉。

秋晚雜興

汀樹猶青未著霜。壠間稗穗已先黃。放翁皓首歸民籍。爛醉狂歌坐簟牀。

又

昔遇高皇起衆材。姓名曾得廁鄒枚。年踰八十猶賒死。卻伴鄰翁斲芋魁。

又

老病侵凌不可當。時時攬鏡自悲傷。西風吹散朝來酒。依舊衰顏似葉黃。

又

冷落秋風把酒杯。半酣直欲挽春回。今年菰菜嘗新晚。正與鱸魚一併來。

又

置酒何由辦咄嗟。清言深媿淡生涯。聊將橫浦紅絲磴。自作蒙山紫筍茶。鄉老舊謂碾磨茶爲作茶。

又

洗耳高人恥見堯。看渠應不受弓招。精神徇物那能久。刀礪君看日日銷。

又

石帆山下醉清秋。常伴漁翁弄小舟。箬笠照溪吾自喜。貂蟬誰管出兜鍪。

又

煙波萬頃鏡湖秋。清嘯雖聞不可求。自是世間知者少。山林何代乏巢由。隱者。

又

禹巡吾國三千歲。陳迹銷沉渺莽中。豈獨江山無定主。苔磯知換幾漁翁。禹廟。

又

江東誰復識重瞳。遺廟欹斜草棘中。若比咿嚶念如意。烏江戰死尙英雄。項羽廟。

又

漠漠漁村煙雨中。參差蒼檜映丹楓。古來畫手知多少。除卻范寬無此工。

又

渺渺風煙接小江。卽錢清江別名。牛頭山色滿蓬窗。門前西走錢塘路。也有閑人似老龐。

霜風

霜風近海夜颼颼。敢效庸人念褐裘。關吏雖通西域貢。王師猶護北平秋。黃旗馳奏有三捷。金印酬功多列侯。願補顏行身已老。區區畎畝亦私憂。

贈丐士

志士寧聞畢世窮。此間從古混蛇龍。尙能忍恥墮間祭。安用追慚飯後鐘。

贈目眇者

達人所遇有生涯。高臥窮閭自一家。閱世正嫌巖下電。開樽且看霧中花。

卷第七十二

閑遊所至少留得長句

畫橈艇子短驢鞦。野店山郵每小留。瓜蔓水生初抹岸。梅黃雨細欲遮樓。遼東邂逅從歸鶴。海上逢迎得狎鷗。豈是人間偏好異。暮年難復作沉浮。

又

垣屋參差桑竹繁。意行漫漫不知村。眼明可數遠山疊。足健直窮流水源。鷺引釣船經荻浦。牛隨牧笛入柴門。試尋高處休行李。清絕應須入夢魂。

又

太平人物自諧嬉。及我青鞋布襪時。丁壯趁晴收早粟。比鄰結伴絡新絲。圓聲坎坎迎神社。大字翩翩賣酒旗。晤語豈無黃叔度。欲尋幽徑過牛醫。

又

已過樵塢到漁村。逢著人家卽叩門。僧釜藜羹加糝美。市壚黍酒帶醅渾。頽齡更媿才能薄。故里方知輩行尊。身迫九原兒亦老。一經猶欲教諸孫。

又

高僧宴坐雪蒙頭。閑牧從來水牯牛。深院陰陰四簷雨。高堂寂寂一簾秋。光明本自無餘欠。夢幻何曾去留。我亦翛然五湖客。不妨相與試茶甌。

晚雨

春旱久閔雨。夏潦復望晴。米盡薪亦絕。漲水與塔平。山信得新粟。欣然聽春聲。書生易滿足。筆硯還施行。南風柱礎乾。西照窗戶明。雨其遂已乎。努力趣秋成。

翌日早晴

澤居傍海壖。暑雨困積潦。四顧路俱絕。所至泥浩浩。坐臥敗屋中。兀若在孤島。得米無束薪。端憂令人老。今朝復何朝。浮雲散如掃。一蟬鳴高槐。兩蝶點平草。欣然受涼颺。便欲事幽討。呼童羈我駒。東走天台道。

一雨二十日

一雨二十日。雨意殊未闌。我廬大澤中。四顧煙水寬。東家有小舟。借我不作難。鷓鴣與鳩鵲。自是平生歡。更作十日期。水淺生小灘。相與極幽賞。勿待江月殘。

入夏多雨雖止復作六月甲寅始大晴

兼旬大雨無晝夜。積潦深虞敗吾稼。豈惟一飽墮渺茫。直恐下溼侵腰胯。南風忽從木末來。新月徘徊出雲罅。州家出符縣家喜。泄水漸空梁可架。放翁亦復扶病起。旋築頽牆補茆舍。便合觀身作老禪。安心穩坐今年夏。

題尊信齋并序

吾友陳希真求序名其書齋。予告之曰。韓文公言讀孟軻書。然後知孔子之道尊。晚得揚雄書。益尊信孟氏。因雄書而孟氏益尊。予謂孔子豈待人而尊。孟子亦豈待人而信。韓之言則過矣。然尊信孔孟者。實學者之本務也。請以名君齋。且爲詩以終吾意。

於庠孔孟何其卓。如天日月地海嶽。正令舉世皆楊墨。邪正豈復勞商榷。雖然此道久橫流。執熱其誰不思濯。魯鄒遺書世皆讀。要以尊信爲善學。吾友希真蓋其人。不肯俛首爲齷齪。羹藜飯豆欲老矣。功雖未竟志則愨。我居山陰子在闕。闕然不見千里邈。澤中久雨道路絕。叩戶忽聞聲剝啄。尊信二字子所知。妙質豈復須斤斲。伏生九十語已訛。失旦自慚猶喔喔。

夏日雜詠

閑居自無客。況復暑如焚。百折赴溪水。數峯當戶雲。幽尋窮鹿徑。靜釣雜鷗羣。舊愛南華語。今方踐所聞。

又

兀兀從誰語。眊眊寄一牀。不嗟頭似葆。但苦汗如漿。欹枕風生竹。鈎簾日轉廊。非由靜勝熱。本體自清涼。

又

蒲葦蕭蕭晚。楸梧肅肅陰。山童驚大斲。林鳥伴微吟。蠻硯深瀦墨。吳牋熟擣砧。新詩與醉帖。自笑尙童心。

又

省事心君靜。忘情眼界平。食便殮酪美。浴試葛衣輕。鶴整千年駕。鷗尋萬里盟。秋風卽在眼。作意上青城。

夏日

颼颼風露髮根涼。月落菱歌盡意長。分得鏡湖纔一曲。喫虧堪笑賀知章。

又

新闢虛堂痛掃除。蕭然終日屏僮奴。此間恐是維摩室。除卻藜牀一物無。

又
平明一浴汗無餘。坐覺胸中合太虛。春玉作糜天所賜。不妨數筓進山蔬。

又
草芝方出峨眉老。力比金丹似更多。秦不及期周過曆。始知養壽在中和。伏中方製艸芝丹。此方出史載之學士家。

苦熱

炎歊行中天。曼膚汗翻水。纖絛薄如霧。不異鎧被體。散髮垂兩肩。萬事棄不理。寸陰若度歲。日暮何可俟。頗聞交廣間。暑又烈於此。此如不可耐。彼豈皆暍死。聊當扶短策。北澗弄清泚。豈必拜賜冰。恩光動閭里。

予頃遊青城。數從上官道翁遊。暑中忽思其人。往年屢遊丈入祠。上官八十如嬰兒。自言少年聾不治。芝房松鬣可無飢。叩之不答。但解頤。德人之容端可師。我聞學道當精思。畢世不可須臾離。公雖泯默意可知。亡羊要是緣多歧。逝從公遊亦未遲。聯杖跨海尋安期。

龜堂

障日松棚正策功。幅巾聊得受微風。蟬聲不斷草堂靜。潦水已歸村路通。拄杖閑行穿犖确。孤雲時見起龍嵒。東陽醇酎無由到。知負今年幾碧筩。郭希呂。呂子益兩友。歲餽酒。今以故不至。

夢中作

試說山翁事。諸君且勿譁。百年看似夢。萬里不思家。夜艾猶添酒。春殘更覓花。卻嗤勾漏令。辛苦學丹砂。

又

平羌江上月。伴我故山來。幽興依然在。浮雲正爾開。清秋纔幾日。黃葉已成堆。未醉江樓酒。扁舟可得回。

秋近頗有涼意

平旦麪數箸。晡時飯一杯。枝梧長日過。悵望早秋來。團扇尋詩寫。緇巾借樣裁。惟應水邊坐。待得市船回。

夜坐中庭涼甚

銀漢迢迢夜氣澄。都忘朝暮困蚊蠅。月從東涌行空闊。風自南來洗鬱蒸。渴解似嘗仙掌露。魂清如近玉壺冰。誰知此際超然處。不減廬山入定僧。

東偏小室去日最遠每爲逃暑之地戲作五字

肅肅簷陰轉。泠泠窻水鳴。高墉日氣遠。方簟午風清。渴愛殮漿美。慵便葛屨輕。新秋忽在眼。結束問山程。

野寺

僧壁題名半闕訛。重來歎息屢摩挲。林蟬欲斷暮復急。竹露如傾秋更多。半俸漸償賒酒券。故衫已換釣魚蓑。西窗一看枯棋罷。歸去還憂爛斧柯。

南堂雜興

車馬無聲晝漏長。野人與世已相忘。屏除長物軒楹爽。洗濯塵襟肺腑涼。秋近平郊鳴鶴鶴。日斜荒徑下牛羊。興來欲喚筇枝去。更盡銅爐一炷香。

又

新涼一夜入郊墟。晨起衣巾爽有餘。燕欲委巢雛盡去。燕有三生雛者。及秋。雛方去盡。扇猶在手。意先疎。題詩又滿牛腰束。采藥常攜鷓鴣背。鋤湖上從今風月好。不妨隨處命籃輿。

又

蛩聲每續蟬聲起。桐葉仍兼柳葉凋。嬾惰心情疎筆硯。久長生計屬漁樵。鬚茅旋補東廂屋。伐石新成北港橋。物外高人來往熟。等閑折簡也能招。

又

毫齒東歸息故廬。聊持頑健託鄉閭。未忘塵尾清談興。常讀蠅頭細字書。貧甚尙能耕有犢。步輕那歎出無驢。南堂又見秋風起。臥看溪雲自捲舒。

又

犇走當年一念差。歸休別覺是生涯。茆簷喚客家常飯。竹院隨僧自在茶。紹興初。僧喚客茶。各隨意多少。謂之自在茶。今遂成俗。禪欠遍參寧得髓。詩緣獨學不名家。如今百事無能解。只擬清秋上釣槎。

又

十里城南禾黍村。白頭心事與誰論。惰偷已墜先人訓。迂拙仍辜聖主恩。病退時時親蠹簡。興來往往出柴門。斜陽倚杖君知否。收點雞豚及未昏。村老人不能耕者。以牧雞豚爲事。村隣皆然。

又

年過八十更應稀。又向清秋聽擣衣。一片雨來書幔黑。數聲鐘斷釣船歸。酒壚好事能焚券。蠶甕無情未解圍。剩欲出門尋一笑。故人零落歎疇依。

又

北連大澤驚秋早。東限連林覺曉遲。數筓藥苗留客話。一爐松火約僧棋。人間掃跡雖堪笑。物外論心頗自奇。有恨未償猶絕歎。青城交舊待多時。

新秋往來湖山間

車似雞栖舟似葉。百里何曾勞步履。朝遊樵風弄清泚。暮泊石帆登岌嶮。旅飯雖春纔脫粟。僧羹無菜寧用挾。歸來村落未上燈。除卻御風無此捷。

又

會稽山下樵風溪。翠屏倒影青玻璃。尤奇峭壁立千仞。行子欲上無階梯。商山坐看紫芝老。武陵無奈桃花迷。人間得意妄自喜。一閔憐汝真醜雞。

又

禹祠巍巍閱千代。廣殿修廊半傾壞。屹然遺窳每摩挲。石長苔侵字猶在。去年已媿曳杖來。今者更用兒扶拜。聊持一酌薦丹衷。衰疾龍鍾神所貸。

又

健席高檣梅市路。朱橋綠樹蘭亭步。兒時釣遊略可記。不料老年猶此處。漁歌相和葦間起。菱船遠人煙

中去世間萬事等浮雲。耐久誰如兩芒屨。

北崦

毒熱憚輕出。新涼尋舊盟。西郊猶近市。北崦漸謀耕。松菊有佳色。山林無俗情。行行望續火。一點隔林明。

小室逃暑

千頃菰蒲萬里風。漁翁散髮臥孤蓬。何如此室纔尋丈。常在冰壺雪窖中。

秋雨中作

燈前劇論與誰同。中歲朋儕亦已空。行道敢希千載上。會心聊付一編中。雨侵壞甃新苔綠。秋入橫林數葉紅。莫怪又生湖海興。此身元自是孤蓬。

目昏有感

兩眸眵昏八十餘。爾來觸事覺空疎。何由四目如蒼頡。讀盡當年倚相書。

幽居

一曲清溪帶淺山。幽居終日臥林間。丹經在昔曾親授。死籍從今或可刪。人笑拙疎安淡泊。天教強健享清閑。秋來漸有佳風月。擬與飛仙日往還。

初秋卽事

簾櫳雨過不勝清。秋氣依依似有情。高棟尙餘雙燕宿。短莎先放百蟲鳴。挑燈剩欲開書帙。擘蟹時須近酒觥。卻媿隣家常作苦。探租黃犢待寒耕。

又

老來閱世苦忽忽。又見流年入鬢蓬。山徑溼螢黏露艸。井牀病葉貫秋風。隣翁每共藜羹味。穉子能終汗簡功。造物於人元不薄。未須抵掌歎囊空。

山庖

新春穉穉滑如珠。旋壓犁祁軟勝酥。更翦藥苗挑野菜。山家不必遠庖廚。

題道傍壁

晚境那禁歲月催。幽花又見澗邊開。莫辭贖買旗亭酒。恐有騎驢李白來。

又

湖廢財存十二三。拍隄漲水尙如藍。吾廬隱翳初非意。頗欲臨流結艸菴。

訪野老

農事元知要細評。野人有舊得尋盟。林深未見果蔬地。舍近先聞雞犬聲。春水築塘謀竭作。陽坡臥犢約同耕。老來常歎人情薄。深媿今朝倒屣迎。

書適

架竹苦茅屋數椽。推開窗戶卽江天。微飢未遽愁長日。小疾何妨度厄年。孤鶴入秋偏警露。斷山欲雨自生煙。囊中妙法君知否。買斷清閑不用錢。

憶蜀

憶昔西遊日。岷峨勝事繁。題詩古柏廟。載酒海棠園。世故紛難料。年光浩莫論。所欣身尚健。短褐醉江村。

生涯

生涯數畦菜。心事一溪雲。樵擔斜陽下。漁歌靜夜聞。門無俗駕到。廚有遠泉分。但了麴蘖事。功名烏足云。

又

身世茫如夢。門庭冷似冰。逢迎賣藥叟。辭謝乞錢僧。羸疾時時劇。衰顏日日增。人扶亦可出。要是藉烏藤。

又

舊業桑麻在。頽齡耄耋過。虞卿著書晚。伏叟授經訛。井上磨樵斫。村東買釣蓑。傾身營一飽。自笑又蹉跎。

又

殘年端有幾。寂寞寄滄洲。鳥宿千林暮。蟲鳴四壁秋。風廊動碓杵。月壠把鉏耰。衣食隨宜具。何心復浪求。

對食作

潦餘多稼猶中熟。種晚嘉蔬亦半收。黃耳蕈生殊自喜。白頭韭長復何求。比量傍舍慚溫飽。誦詠農書儆墮偷。偶有一樽難獨啜。過門誰肯小遲留。

曉思

昏昏斷夢帶餘醒。散髮披衣坐待明。城角吹殘河漸隱。海氛消盡日初生。老農自得當年樂。癡子方爭後世名。莫怪閉門常嬾出。卽今車蓋爲誰傾。

戲書

柳下人家枳作籬。小姑不畫入時眉。緯車聲出窗扉裏。正是新涼夜永時。

梅市舟中作

漕渠北向小橋通。漸入蒼茫大澤中。造物將無知我醉。故吹急雨打船篷。

孤店與兒孫。送五郎爲淮西之行。小飲民家。是日雲興。頗憂雨。

孤店門前千萬峯。酒濃不抵別愁濃。明朝晴雨吾能卜。但聽蘭亭古寺鐘。

過魯墟先太傅舊隱

桑竹蕭條帶夕陽。故居依約古河傍。頽垣壞甃無尋處。父老猶言學士莊。

步月

鷗鷺論交有舊盟。越山勝處著柴荆。只思小閣焚香臥。偶作長堤蹋月行。湖闊煙鐘來縹渺。林疎漁火見分明。店家已賣新篘酒。一醉今宵似可成。

拄杖示子邁

拄杖相從四十年。交情耐久獨依然。西窮巫峽岷江路。北抵岐山渭水邊。早已歸休弄泉石。老猶緩步歷風煙。會同鉢袋并禪版。付與兒孫世世傳。

讀道書

一境有神龍。歲不畏枯旱。爲國常得賢。百世不可亂。吾讀黃老書。掩卷每三歎。正使未長生。去死亦差緩。如何不自力。白首猶漫漶。友朋死略盡。日月難把翫。豈無獨往願。兒孫苦羈絆。安得葛與陶。相從明此段。

秋日睡起

白露已過天益涼。練衣初覆篝爐香。天其閱我老且憊。付以美睡聲撼牆。離騷古文傍倦枕。砥柱巨刻懸高堂。睡餘一讀搔短髮。萬壑松風秋興長。

書意

屋漏徙我牀。窗破補其罅。衣穿傲狐貉。食淡忘膾炙。人生老可哀。百事就衰謝。我喜在得歸。味美如啖蔗。雖云茅茨陋。豈不賢傳舍。兒能牧雞豚。身自種桑柘。市墟酒易賒。鄰廐驢可借。睡任門生嘲。醉無官長罵。見書眼先閉。惰懶亦自赦。卻後五百年。林間作佳話。

寄題龔立道崑山棲閑堂

我居山陰古大澤。出門尙恨風煙迮。欲求曠快舒眼力。夢中去作棲閑客。棲閑主人計不疎。萬卷讀盡家藏書。平時不喜入城府。況肯自屈承明廬。聽雞束帶誰不爾。明時可仕君獨止。不妨借地作園林。買山豈是巢由事。園廬皆借地營之。

秋雨書感

新春赤米摘青蔬。一飽從來不願餘。門外久無溫卷客。架中寧有熱官書。濁醪未廢時時歡。短髮猶須日日梳。自笑少年風味在。滿川煙雨正愁予。

又

晨起開門雪滿簷。東崗一徑得幽尋。斷雲殘雨歲華晚。丹實碧花秋意深。林下已悲身老病。人間猶與俗

浮沉牀頭小甕今朝熟。又喚隣翁共淺斟。

弄筆

少學文章竟不成。暮年腕弱字欹傾。抽毫欲下還休去。斐几空憐似砥平。

睡覺作

世言黃帝華胥境。千古秦荒孰再遊。但解消搖化蝶翅。不須富貴慕蚍蜉。

又

邯鄲夢事豈關身。未熟黃粱迹已陳。輸與烏衣老鈴下。日中睡覺一顰伸。

秋思

露濃壓架葡萄熟。日嫩登場穉稬香。商略人生如意事。及身強健得還鄉。

又

三三兩兩戲魚行。香餌纔投去若驚。寄與扁舟五湖客。只當遠引過平生。

又

一篇舊艸天台賦。六幅新傳太華圖。占盡人間清絕事。紫藤香起竹根爐。藤香近出廬山。

又

村南村北鵝鳩鳴。小雨霏霏又作晴。拂枕欹眠不成夢。卻拖藤杖出門行。

又

出門東行復西行處處人家打稻聲小甕秬醅雖未熟後園楮蕈已堪烹

又

看雲廬阜屏風疊采藥嵩山冠子峯行盡四方心未快不如一權醉吳松

又

桑竹成陰不見門牛羊分路各歸村前山雨過雲無迹別浦潮回岸有痕

又

隣砧落日數聲殘汀樹秋風幾葉丹冉冉清愁來不斷無方能使酒腸寬

又

老子齋居罷擊鮮木盤竹筍每隨緣隣僧不用分香鉢蓮芡猶堪過半年

又

存神止慮自長年黃老遺書漢尙傳妙語雖傳人不省卻從丹竈覓神仙漢武帝賜平津侯詔曰君其存精神正念慮輔助醫藥以自持祗侯與楊王孫書曰願存精神省思慮進近醫藥厚自持其語悉同疑出於黃老遺書至漢尙傳也

秋來苦貧戲作

閉門高臥養吾真說著生涯笑倒人奴閔囊空辭雇直婢愁鬢冷拾炊薪羹能有糝猶爲泰地到無錐始是貧一飯不妨支一日讀書常媿聒比隣

晚晴

雨餘殘日入疎籬。變化相乘乃爾奇。千嶂暮雲收盡後。一年秋暑洗空時。如山酒券不相貸。隔巷衣砧如許悲。剩欲出門紆滯思。交親零落與誰期。

對月

遠客厭征路。流年逢素秋。不知今夜月。還照幾人愁。

又

艸艸治杯盤。三更月露寒。茆簷雖隱翳。終勝客中看。

出近村晚歸

松枝代如意。練布製單衣。出每沾晨露。歸當送夕暉。野花當路發。沙鳥背人飛。到舍燈初上。茅簷聞踏機。

又

苦雨秋將晚。羈愁酒易醺。百年終腐骨。萬事盡浮雲。果熟多猿噉。林疎過鹿羣。亦思書觸目。老嬾不成文。

秋晚

雞聲喔喔頻催曉。木葉颼颼已變秋。憂患縱多終強項。飢寒未至且優游。老羆尙欲身當道。乳虎何疑氣食牛。時黑孫方生半年。但有一愁消未得。大兒白髮戍邊頭。

犬雞

小犬一何警。日夜吠籬落。老雞則不然。平旦方喔喔。勤惰各其性。於我何厚薄。糠糶一施之。且復慰寂寞。

賣藥翁

老翁如我老賣藥以代耕得錢付酒家一毫不自營浩歌和隣叟苦語誨後生我欲爲作傳無人知姓名

書里中事

事近接耳目誕信良易知頗疑有定數一惑不可移坐視非所安忠告反取疑雖抱愚直意妄發悔曷追

書室雜興

秋水淺出灘秋葉落成陣方喜風露清已歎霜霰近衰疾雖向平不死亦董董燈青地爐冷吾學其少進

又

衣多藏之笥食餘積之困我享既有限富亦豈勝貧布褐本自溫筍蕨固已珍君看梁伯鸞寄食終其身

又

老眼觀細書紛然黑花墜不如袖手坐嘿誦舊所記但恨志弗強編簡頗失次後身作書生努力究此事

又

學書五十年其進不及寸未能踐繩墨況敢說豪健雖然亦有用尙足博麤飯開學教牛經坐市寫驢券

秋感

瘦盡腰圍白盡頭悲蛩聲裏落梧桐短檠且慰經年別豎褐猶懷卒歲憂天地無私嗟獨困風霜有信又殘秋頑軀安得常強健更倚東吳寺寺樓

秋夜

秋色滿江干。江楓已半丹。身閑詩簡淡。道勝夢輕安。偃蹇憐腰折。清臞鄙面團。何妨杵衣夜。又見歲將殘。

又

落葉鳴遙夜。啼螿送暮秋。不知何許笛。故作此時愁。清海三年戍。黃旗萬里侯。何如石帆下。煙雨釣滄洲。

卷第七十三

秋日村舍

會稽城南古大澤。霜晴水落煙波迤。寒風蕭蕭凋榉柳。暖日暉暉秀麩麥。傳聞新詔募新軍。復道公車納羣策。忠誠所感金石開。勉建功名垂竹帛。

又

川雲慘慘欲成雨。宿麥蒼蒼初覆土。芋肥一本可專車。蟹壯兩螯能敵虎。村村婚嫁花簇檐。廟廟禱祠神降語。兒孫力稼供賦租。千年萬年報明主。

村遊

閉戶苦無慘。行行不覺遙。人稀廢古井。水退築新橋。野店聽山雨。僧廚餽藥苗。湖中有高士。折簡恐難招。

吳歌

勝負兩蝸角。榮枯一蟻窠。人情苦翻覆。吾意欠蹉跎。困睫憑茶醒。衰顏賴酒酡。坐人能聽否。試爲若吳歌。

秋感

扶杖龍鍾迫耄期。江湖木落更堪悲。醉中光景似得志。夢裏朋儕如少時。落筆龍蛇仲蒙帖。茵園器一字。仲蒙滿懷風月季。長詩前朝名勝凋零盡。百歲關心只自知。

又

聖世優容許乞身。歸來猶幸齒齊民。漁家那有懸車地。蔬食何施祝鯁人。獠婢臨溪漂衣絮。蠻童掃葉續炊薪。生涯如此仍秋暮。賴是從來慣處貧。

紹興辛未至丙子六年間。予年方壯。每遇重九。多與一時名士登高於葢山。宇泰閣。距開禧丁卯六十年。憂患契闊。何所不有。追數同遊諸公。乃無一人在者。而予猶強健。慘愴不能已。賦詩識之。

故里登高接雋遊。卽今不計幾番秋。一樽尙與菊花醉。萬事不禁江水流。薄命雖多死閭巷。逢時亦有至公侯。若論耄歲朱顏在。窮達皆當輸一籌。

結茅

結茆湖曲兩三間。客少柴荆盡日關。插架圖書娛晚暮。滿灘鷗鷺伴清閑。壁龕吳晉千年字。廝地得吳永安晉太康中古甌。窗納秦稽萬疊山。自怪堅頑推不倒。時來臨水照蒼顏。

老健

年垂九十身猶健。竹屋荆扉不厭低。挈榼自沽深巷酒。擁衾遙聽別村雞。家添豚柵還堪賦。路認牛欄每不迷。惟恨窮秋開霽少。晚來小雨又成泥。

幽居卽事

壯歲本亡奇，頽齡又及斯。極知身有幾，惟是醉相宜。燒艸溫新犢，編籬護伏雌。謀生未忘念，笑語路傍兒。

又

晚日照茅茨，西風吹接羅。貧思止酒易，老悔養丹遲。斷地秋畦藥，焚香夜撲蠶。呼兒具舟楫，吾欲上湘漓。

秋晚書感

犧象初心豈願才，溝中雖斷不須哀。吾生自信雲舒卷，客態誰論燕去來。夕露正看沾艸棘，晨霜已見落楸槐。老年閉戶真無憾，葑火更闌熟芋魁。

小市暮歸

愛酒行行訪市酤，醉中亦有穉孫扶。林梢殘葉吹都盡，煙際孤舟遠欲無。野餉每思羹苜蓿，旅炊猶得飯雕胡。青山在眼何時到，堪歎年來病滿軀。

寓歎

日夕羊牛下，月明烏鵲飛。林林皆有託，貿貿獨安歸。疾疢方求藥，秋高未製衣。岷峨不遂隱，更恨昔謀非。

又

交世非初志，謀生又絕疎。家貧思辟穀，人忌悔知書。門異回軒巷，乘無秃尾驢。老頑君勿怪，萬事有乘除。

又

短髮不禁搔，紆悲賴濁醪。潦收溪瀨急，木落寺樓高。善飯餘何欠，看雲亦足豪。今朝有奇事，江浦得霜螯。

題僧菴

細路穿雲塢。危橋渡野塘。人稀土花碧。屋老瓦松長。憂患雙蓬鬢。裝資一布囊。燒薪藉餘暖。今夜有新霜。

哭季長

嶼山剡曲各天涯。死籍前時偶脫遺。三徑就荒俱已老。一樽相屬永無期。寢門哀慟今何及。泉壤從遊後不疑。邂逅子孫能記此。交情應似兩翁時。

又

我荷鋤時君賜環。君歸我復造清班。無由促席暫握手。每得寄聲聊解顏。造物不令成老伴。著書猶喜在名山。季長晚著書數百卷。半年僅得陳蓴鱖。白首臨風涕自漣。

魔境作頗思遠適賦此自遣

夜夜燃燈旦旦香。修行老尙墮微茫。齋居自許塵心盡。遇事方知業力強。兩屨生雲入濳皖。孤舟載月上瀟湘。道人行行李君毋笑。惟是著筒與藥囊。

枕上

窗紙蕭蕭印月痕。數聲新雁過江村。孤愁不與夢俱斷。羸老豈知身尙存。世事萬端歸蠹簡。秋風百感集清樽。荷鋤家圃知何憾。猶勝生求入玉門。

讀幽詩

我讀幽風七月篇。聖賢事事在陳編。豈惟王業方興日。要是淳風未散前。屈宋遺音今尙絕。咸韶古奏更

誰傳吾曹所學非章句。白髮青燈一泫然。

北窗

半世蟬嘶坐北窗。老年依舊守殘缸。買書安得黃金百。覓句如求白璧雙。老氣尙思吞夢澤。壯遊曾是釣巴江。寒生事業秋毫盡。筆力終慚鼎可扛。

小圃醉中作

搖落園林探借春。耄期詩酒肯輸人。狂時湖海猶嫌迮。遠處羲農亦未淳。木葉蔽身如盛服。藜羹加糝卽常珍。巢由尙隱唐虞代。漫道桃源可避秦。

秋冬之交雜賦

蓬戶終年閉。靈臺一事無。貧猶能自活。衰未藉人扶。兒學無畝異。孫啼有啓呱。東隣麴道士。折簡也能呼。

又

霽日收殘靄。微霜作早寒。桐凋無宿葉。水退出新灘。室小纔容膝。門低每觸冠。平生只此是。何物動憂端。

又

避俗嫌林淺。安貧覺屋寬。地爐燒葑火。土榻藉蒲團。稚子誇藜糝。高僧輟芋殘。霜寒固難出。不怕笑蹒跚。

又

嶺下晨炊黍。津頭暮繫船。寒潮吞別浦。老木慘蒼煙。市徙新山步。耕侵古廟壩。閑人不蓄幘。散髮醉江天。

霧雨林塘晚。風霜聚落寒。衣冠存簡朴。農圃備艱難。春籩麩供餌。蒸炊豆作團。此心如古井。無地起濤瀾。

又
碓舍臨寒水。漁舟弄夕霏。烏將九子過。雉挾兩雌飛。浮世萍無蒂。流年弩發機。常思南鄭日。縣驛跨驪歸。
漢中西縣村落。下臨讓水。景物頗似吾鄉。

海山

補落迦山訪舊游。菴摩勒果隘中州。秋濤無際明人眼。更作津亭半日留。

飲村酒

湘浦騷人詠。啜漓黃州飲。濕又增奇。紛紛坐客評清濁。我已昏然睡不知。

觀諸將除書

百鍊剛非繞指柔。貂蟬要是出兜鍪。得官若使皆齊虜。對泣何疑效楚囚。

捫腹

身如椰子腹瓠壺。三畝荒園常荷鋤。著萬卷書雖不足。容數百人還有餘。

醉歌

卻日莫揮戈。君當聽我歌。花殘狂有限。酒熟悶無多。生理憑長鏡。幽情寄短蓑。江湖秋萬里。未死且婆娑。

自歎

惡殺常根食。安貧但縵袍。消搖敢言達。簡默本非高。入剡逢飛雪。遊吳看怒濤。平生笑漁父。苦語勸鋪糟。

村翁

不入城門三歲餘，亦無車馬過吾廬。食常藁芋已忘肉，年迫蓋棺猶愛書。處處叩門尋醉叟，時時臨水看遊魚。半生名宦終何得，作箇村翁計未疎。

不寐

一竿江渚寄沉冥，衰疾侵凌失鬢青。困睫日中常欲閉，夜闌枕上卻惺惺。

書志

平生不喜作鵬搏，常伴寒蟬語夜闌。一椀淖糜支日過，數椽破屋著身寬。衰殘雖已歎垂白，憂患未容侵渥丹。後五百年吾話在，笑君虛坐幾蒲團。

東偏紙閣初成

蚍蜉占雨解移穴，蟋蟀畏寒先近牀。我亦聯屏爲燠室，一冬省火又宜香。

小豎醉

漫道樽中酒不空，歌呼誰解和衰翁。可憐小豎如獐獍，卻有平陽吏舍風。

雜興

寸陰可惜子所知，尺宅治生今未遲。虛費年光作閑事，人間信有白頭癡。

又

堯舜桀紂皆腐骨，王侯螻蛄同丘墟。麥苗覆塊鳩喚雨，常恨無人同荷鋤。

又
一春妍暖無多日。八十康強有幾人。學不名家空自苦。路邊醉倒卻關身。

又
詩人肝肺困雕鐫。往往壽非金石堅。我獨適情無傑句。化工不忌遺長年。

示兒孫輩

咎忝諸生後。初非一世豪。但希卿有秩。敢望郡功曹。斂版寧爲辱。扶犁亦足高。兒孫勿妄想。底處不徒勞。

雜賦

養疾清溪曲。風林幾著霜。細書如助嬾。薄酒不成狂。老歎朋儕盡。閑知歲月長。柴門偶一出。倚杖立斜陽。

又

孤學遠流俗。危機歷畏途。逢人增懍懼。看鏡失膚腴。閉戶書圍坐。移燈影向隅。空懷四方志。泯默死東吳。

又

家業貧原憲。年齡老伏生。但悲鸞獨舞。那羨雁能鳴。釀酒秋常醉。驅牛夜亦耕。此身當自貴。勿用作投瓊。

又

貴固不如賤。狂應未勝癡。閉門真已矣。命駕欲何之。碧縷生香袖。清漪漲硯池。是中有佳處。不覺晝陰移。

又

海上魚鹽聚。煙中雞犬聲。耕農叱牛去。醉叟策驢行。斂薄民差樂。烽消盜略平。悠然憩松下。我亦有幽情。

又

櫛髮晨興後。寬腰午餉餘。講明窮理學。警校養生書。倚杖聽啼鳥。臨池看戲魚。怡然又終日。底事解愁予。

幽居

人間歲月苦駸駸。白首幽居不厭深。嬾愛舉杯成美睡。靜嫌對弈動機心。山村野渡雙芒屨。夜雪晨霜一布衾。不到匡廬三十載。夢攜中鉢上東林。

連日作陰頗有雨雪意

十分曆日過八九。徂歲迫人殊可驚。霜木蕭蕭臨古道。雪雲慘慘冒高城。山頭噤雀無生意。水面飢鳶有墮聲。剩壓新醅供旨蓄。從今次第問春耕。

山房

四紀移家剡曲傍。自茨生艸作山房。寒侵夜艾知霜重。行遍天涯覺夢長。戒婢無勞事釵澤。課奴相率補陂塘。無衣已免幽人歎。數箔春蠶歲有常。

梅市暮歸

老境惟閉門。不與事物接。時逢佳山水。尙復快登涉。山程策小蹇。水泛搖短楫。今茲稅駕地。佳事喜稠疊。雲生濕行膝。風細掠醉頰。旅羹芼玉糝。僧飯敷白氈。葑火煨芋魁。瓦甑炊豆莢。經行出幽圃。懷抱頗自愜。枯籬絡丹實。深澗堆黃葉。白雲橫谷口。綠篠穿山脇。還家寧迫暮。取路羞徑捷。何當倚蒲龕。一坐十小劫。

法雲寺

法雲古蘭若。西走錢塘路。帆影梅市橋。人語柯山聚。吾家昔爲隣。來往無晨暮。十世三百年。散徙非復故。修廊與廣殿。亦已化煙霧。經營久不倦。大體始略具。鐘魚以時鳴。軒檻有幽趣。中庭掃蕪穢。斷碣起顛仆。老我絕世緣。隨身惟兩屨。願言治北窗。寂寞同子住。

郊居

郊居本宴如。觸事自多感。況當搖落時。雲重天慘慘。路窮非通途。地偏無遠覽。殘蕪連古道。槁葉滿幽坎。老來厭了了。萬事付黠闇。地爐熾生柴。喚客烹齋糝。

作雪不成獨詠

淡日朝穿霧。濃雲夜護霜。風聲空浩蕩。雪意愈微茫。棐几閑臨帖。銅爐靜炷香。悠然踐殘歲。不是傲羲皇。

聞雁

蜻蜓浦中聞雁聲。寒侵短褐客愁生。忽思大散關頭路。雪壓蒙氈夜下程。

泛舟至蜻蜓浦小泊漁村

醉泛蜻蜓浦。啞一鰲聲。陂塘秋水瘦。墟落暮煙生。野店曾留醉。樵翁不記名。相逢雖惘惘。懷抱已先傾。

散策門外隣叟怪其瘦

八十衰翁力旣憊。強扶藤杖出門前。朝晡恃粥何勞歎。齒脫牙搖已數年。

書警

束帶接一客。伸紙報一書。未爲甚疲勞。已覺不枝梧。惟有袖手坐。儼然如齋居。尙懼精神衰。藥石以自扶。

又

情慾雖害人。要是自感溺。吾觀日用事。飲食真勍敵。乃知七箸間。其禍甚衽席。堂堂六尺軀。勿爲口腹役。

園中

殘菊無復花。遊蠶抱枯叢。我老復多疾。寄迹窮巷中。開門無客至。安取樽不空。夕陽掛高樹。此日還怱怱。

冬晴行園中

冬溫光景如春妍。暮年強健勝壯年。手推園門拂石坐。豈暇爲客思無氈。殘蕪未死更鬱鬱。晚菊欲槁猶鮮鮮。閑愁正得酒彈壓。此夕預知當熟眠。

又

桔槔灌蔬固已非。竹筧澆花宜見譏。杏繁梅瘦種性別。一氣生殺均天機。細推物理孰不爾。搏風未可嘲卑飛。君其置之且共酌。白酒方熟黃雞肥。

懷青城舊遊

宦途到處不黔突。惟有劍南糜歲月。屢遊老澤蒼玉嶂。疑是虛皇白銀闕。松肪擣麩具晨餐。擲葉作衣勝短褐。泥飲不容繁杏落。浩歌常送寒蟬沒。水邊洞口適有遇。握手一言換凡骨。少陵老子未識真。欲倚黃精除白髮。

晚立

倦憑小豎立柴門。殘角疎鐘欲斷魂。傷雁養翎依荻浦。渡牛浮鼻望煙村。壯心已覺隨年往。孤學何由與

俗論數點雨聲催返舍。小窗燈火對壺殮。

志喜

雪鬢蕭蕭九十翁。短檠猶喜策新功。斲輪自得傳處。治水本行無事中。山市兒童隨小蹇。江村煙雨宿孤蓬。更知衰疾從今減。萬里塵清蜀藥通。

窮居

仕宦初何得窮居。半士農。清宵叔夜鍛。平旦伯鸞春。馬磨猶支日。牛衣亦過冬。湖中有嘯父。何計得相從。
湖中隱士。月夜棹舟。其疾如飛。竝湖有聞其嘯歌者。

冬暖園中萱艸蔚然海棠亦著花可愛作路浚井皆近事也

暖景變嚴冬。誰知道造化功。少留萱艸綠。探借海棠紅。築路橫塘北。疏泉小嶺東。欣然得佳處。忘卻歲將窮。

卽事示兒輩

今歲霜遲殊未寒。籬東烏桕葉纔丹。病輕漸喜免求藥。老甚難誇能據鞍。隣舍僧貧分米少。酒坊人熟督錢寬。晚來笑向兒孫說。且得無生一話團。

小雨頗寒

冬温初喜一寒新。紙閣磚爐養病身。殘雨已收猶點滴。斷雲欲散更輪囷。衣裳可典寧留筍。口腹雖饒肯累人。一事明朝差似樂。探梅閑岸接羅巾。

題舍壁

身寄瓜牛廬。手持科斗書。尚憎鷺戀棧。肯羨鶴乘車。富貴何加我。山林亦宴如。年來常去殺。不歎食無魚。

又

艸沒孔明廬。塵流倚相書。家居四立壁。出駕獨轅車。窮達本無擇。死生良自如。鏡湖三百里。處處侶禽魚。

仲冬書事

邊頭無警少鈴聲。病得新霜亦已平。赤脚聽蛩勤夜績。蒼頭租犢待冬耕。發奩雙兔駢頭臥。溢榼芳醪徹底清。里巷紛紛誇節物。春盤儺鼓漸關情。

醉舞

渭城朝雨不須歌。爛醉江頭舞短蓑。自是先生眼根鈍。天狐伎倆本無多。

思蜀

白帝城邊八陣碛。青城山下丈人祠。英雄不生僊又去。零落艸間多折碑。

又

蜀莊鳴飛隘九區。超然豈止山澤癯。荒臺古井無處所。行子但覓房公湖。

次韻李季章參政哭其夫人

飛蓋傳呼入省門。依然殘夢浣花村。遙知最是傷心處。衫袂猶霑掃黛痕。

又

焚香黃閣退朝歸。道話時時正要提。九十老翁緣底健。一生強半是單栖。

又

萬里氈車入鳳城。豈知遽已迫斜曛。似聞後院思遺愛。掩淚人人說小君。

又

佛供齋僧冀萬分。幽明路絕竟難論。若爲可慰重泉念。觸事平心無怨恩。

又

熬蒿一去杳難知。數紙遺書手自披。切勿輕爲歸蜀夢。竹枝忍復聽吾伊。

又

害道無如狗愛噴。養生尤要齋精神。祝公少置空閑憶。天下安危在此身。

又

富貴思歸豈坐迂。嶼山種芋已成區。獨歸它日公無憾。天際煙帆與石俱。李公買石甚富。將載以歸。

試筆

人間元無第一手。萬事端如屈伸肘。但能看破卽超然。何代商山無四叟。老民自視中何有。傾身經營一杯酒。此外管城差可人。相從且作明窗友。

屠希筆

屠希一筆價必千。紹興初載海內傳。高皇愛賞登玉几。求書蚤暮常差肩。一朝希死子孫弱。歲久僅可售百錢。宣城晉陵競聲價。外雖甚飾中枵然。嗚呼世事每如此。使我太息中夕眠。

寒夜吟

仕宦孰不願美官。無如兩膊聳聳寒。可憐誤信紙上語。至死功名心未闌。骯髒得倚門。矍鑠猶據鞍。何如百年中。盡付一漁竿。布襦可以度雪夕。麥飯可以支朝餐。但知禪龜著身穩。莫和詩人行路難。

記夢

衣紳飄舉髮颯颯。一鶴聊爲太華遊。每過名山思小憩。天風浩浩不容留。

霜夜

月淡霜清夜漏遲。疎鐘杳杳度南陂。燈殘有恨欲誰語。雞老無聲如我衰。使入蜀川方在道。書傳淮浦定何時。若爲可遣閑愁得。獨擁寒爐爇豆萁。時方附蜀中便舟寄書長季張家。又未得古壽書。每關懷。

又

土牀紙帳臥幽寂。枕上細聽城上更。檣柵燒殘地爐冷。喔咿聲斷天窗明。風霜欲透茅茨屋。鹽酪不下齋糝羹。猶恨扶犁老無力。向來枉是請躬耕。

歲暮

歲暮風霜慘。村深艸棘稠。力衰行每蹇。衣薄鼻多鼫。久矣當長往。悠然尙小留。兒童報炊熟。得飽且忘憂。

與野人散策門外

春意侵寒律。川雲結夕陰。閑人了無事。隣叟偶相尋。廢沼萍黏塊。孤村雀滿林。世間眞夢耳。何物可關心。

入冬殊未寒。塵土冒原野。溝溪但枯萍。不聞清湍瀉。今夕復何夕。急雨鳴屋瓦。豈惟宿麥長。分喜到菜把。明朝開衡門。想見泥濺踝。豐年儻可期。擊壤歌幽雅。

自述

怡然氣貌漸還嬰。淡飯麤裘過此生。儘道無方能縮地。夢中夜夜上青城。

又

齒脆復牢能咀嚼。足攣漸愈可跣跣。短檠非復衰翁事。且與兒孫共地爐。

歲暮老懷

粥美忘流歎。燈孤伴獨吟。衾寒知夜艾。身痛卜天陰。薪炭常憂絕。杯觴不厭深。故人今已矣。三歎有遺音。
謂季長也。

書況

垂白渭南叟。深居湖上村。貧知蔬食美。閑覺布衣尊。琴譜從僧借。茶經與客論。探梅來直步。沽酒到偏門。細織籠安鶴。頻求果飼猿。舊書編未絕。猶足教諸孫。

